



Broj: 02-04-660/20

Datum, 03.06.2020. godine

ZAPISNIK **sa 36. redovne sjednice 6. saziva Općinskog vijeća Doboj Istok**

Tridesetšesta redovna sjednica 6. saziva Općinskog vijeća održana je dana 30.05.2020. godine u zgradi općine Doboj Istok, u Klokotnici, sa početkom u 10,00 sati.

PRISUTNI: 17 vijećnika, Kemal Bratić, općinski načelnik, Omer Hadžić, sekretar općine, Admir Šišić, ovlašteno lice da zamjenjuje pomoćnika općinskog načelnika za društvene djelatnosti, branilačko – invalidsku zaštitu i opću upravu, Sulejman Delić, pomoćnik općinskog načelnika za civilnu zaštitu i Abdulah Hrnjičić, ovlašteno lice za zamjenjuje pomoćnika općinskog načelnika za prostorno uređenje, Emira Skula, direktorica JU za predškolski odgoj i obrazovanje „Dječija radost“ Doboj Istok, Omer Konjić, direktor JU Centar za socijalni rad Doboj Istok, Nermin Suljkanović, direktor JZU Dom zdravlja Doboj Istok, Šemsudin Bećirović, predsjednik Općinske izborne komisije Doboj Istok, Rasim Sofić, tehnički direktor JKP „Čisto“ d.,o.o. Doboj Istok, Izet Škrebo, predsjednik Organizacije ratnih vojnih invalida općine Doboj Istok, Senad Batalević, predstavnik Udruženja građana dobitnika dobitnika najvećih ratnih priznanja općine Doboj Istok, Hava Mešić, predsjednica Organizacije porodica šehida i poginulih boraca općine Doboj Istok, Husein Šuvalić, predsjednik Crvenog križa općine Doboj Istok i predstavnik Organizacije demobilisanih boraca općine Doboj Istok, Sudina Hadžić, predsjednica Udruženja žena općine Doboj Istok, te predstavnik RTV TK.

Sjednicu je otvorio i vodio predsjedavajući Općinskog vijeća, dr. Ferid Konjić.

Dr. Ferid Konjić, predsjedavajući Općinskog vijeća: „ Na početku sjednice selamim kolege i kolegice vijećnike i predstavnike medije. Načelnik je najavio da će zakasniti 10 minuta. Niko od vijećnika nije najavio izostanak i molim tehničkog sekretara da nam provjeri prisutnost vijećnika. Prisutno je 16 vijećnika, a trenutno je odsutna Senada Džanić. “

USVAJANJE ZAPISNIKA SA PRETHODNIH SJEDNICA

Dr. Ferid Konjić, predsjedavajući Općinskog vijeća: „ Dobili ste zapisnike sa 34. i 35. redovne sjednice i ukoliko ima primjedbi dajem mogućnost da se iznesu. Ne vidim prijavljenih i dajem na izjašnjavaње. Ko je za zapisnike?“

Glasanje: ZA – 16, PROTIV – 0, UZDRŽANIH – 0.

VIJEĆNIČKA PITANJA I INICIJATIVE

Dr. Ferid Konjić, predsjedavajući Općinskog vijeća: „ Ukoliko ima pripremljenih vijećničkih pitanja i inicijativa dajem mogućnost da se iznesu. “

Izet Hodžić, predsjednik kluba vijećnika GDS i nezavisni vijećnik Sajib Mešić: „ Uvaženi predsjedavajući, dopredsjedavajući, kolege vijećnici i vijećnice, pomoćnici načelnika, gosti, predstavnici sedme sile ja imam jednu vijećničku inicijativu i nadam se podršci od prisutnih vijećnika. Inicijativa je poduža pa ću pokušati da je skratim. Podnosim inicijativu i molim kolege vijećnike da podrže ovu moju inicijativu i da donesemo zaključak vezano za istu. Inicijativa se sastoji iz tri segmenta, a smatram da bi ovu inicijativu, odnosno zaključak trebalo uputiti svim općinskim, odnosno gradskim vijećnima na

području Tuzlanskog kantona, kao i Skupštini Tuzlanskog kantona (kao najvišem zakonodavnom organu na Kantonu) a Skupština bi dalje uputila, ako smatra za potrebnim, organima čija je nadležnost rješavanje ovog problema (Parlament Federacije BiH, Upravni odbor Federalne poreske uprave i Upravni odbor Uprave za indirektno oporezivanje). Inicijativa se sastoji iz sljedećih elemenata:

- Da se donese odluka o ukidanju taksu, odnosno naknada koje se plaćaju prilikom izdavanja uvjerenja o izmirenim obavezama za poreze i doprinose (taksa u vrijednosti od 15,00 KM) zatim taksa za izdavanje liste uposlenih lica datog društva od strane Federalne poreske uprave.

Smatram da su to dodatna opterećenja privrednim licima, a normalno i građanima, kao i ostalim poslovnim subjektima u ovim teškim ekonomskim prilikama.

Obrazloženje: prilikom traženja bilo kakvog uvjerenja od, u ovom slučaju, Poreske ispostave mi smo dužni za uvjerenja o izmirenim poreskim obavezama da uplatimo 15 KM takse da bi dobili to uvjerenje. Ako uredno izmirujemo poreske obaveze treba da platimo još i tu naknadu. Smatram za potrebnim da u ovim vremenima ta naknada bi trebala da se ukine iz jednog prostog razloga što to uvjerenje ne može služiti za svaku namjenu. Prilikom apliciranja na javni poziv ili bilo šta, navodim konkretan slučaj, u zadnjih 10 dana ja sam imao potrebu da izvadim 5 takvih uvjerenja i platio sam 75 KM. Vjerovatno ima dosta firmi kojima je potrebno više tih uvjerenja, a namjena uvjerenja tamo je decidna i služi samo jednokratno za tu svrhu. Kada se to pomnoži na nivou godine to nisu toliko značajna sredstva, a kada gledamo tih 15 KM neko će reći šta je to, nije to nešto za ugostitelja, za privrednog subjekta ili za građanina, ali vjerujte mi kada se to sabere na nivou godine. Ako se uredno izmiruju poreske obaveze ja smatram da nema potrebe da poreski obveznik ili građanin plaća i tu vrstu naknade. Mislim da je taj zakon propisala Federalna skupština ili Upravni odbor Poreske uprave Federacije BiH. To je jedan od segmenata, druga stvar je:

- Da se donese odluka o ukidanju taksu, odnosno naknada koje se plaćaju prilikom izdavanja uvjerenja o izmirenim indirektnim porezima od strane Uprave za indirektno oporezivanje (taksa u vrijednosti 20,00 + 10,00 KM).

Razlozi za donošenje ovakve odluke su identični kao i u prethodnoj tački. Ista je stvar, od Regionalnog ureda Uprave za indirektno oporezivanje ako tražite uvjerenje o izmirenim indirektnim porezima morate uz zahtjev priložiti dokaz o uplati da ste izvršili uplatu naknade za izdavanje tog uvjerenja. Smatram da je znak dobre volje da Uprava za indirektno oporezivanje, odnosno Upravni odbor Uprave za indirektno oporezivanje donese odluku da se te naknade ne plaćaju. Na samom početku ove inicijative rekao sam da bi trebalo da se proslijedi ova inicijativa, normalno ako dobije podršku vijećnika i ako budemo smatrali za potrebnim, da Skupština Kantona uputi sličnu inicijativu na adrese ovih institucija. Treća stvar, a po meni veoma bitna i najbitnija:

- Predlažem da se uputi zahtjev Skupštini Tuzlanskog kantona da se donese odluku o ukidanju izdvajanja naknade za šume, a to je kantonalna naknada.

Prilikom izrade završnog računa mi smo obavezni da obračunamo naknadu za šume koja iznosi 0,07% a koja takođe nije ni malo značajna. Ja sam se malo raspitao po kantonima i kod nas na Tuzlanskom kantonu koliko je firma imala prihoda u toku godine bez PDV pomnoži se sa 0,07% i to je cifra koju privredno društvo mora da plati. Da li je to društvo poslovalo pozitivno, da li je u gubitku, da li je ostvarilo dobit mora platiti taj iznos i to uopšte nije značajna cifra. Navodim primjer kod mene je otprilike polugodišnja plata jednog radnika izdvajanje za šume. To je kantonalni zakon i kantonalna skupština može to da riješi. Imam saznanja, što je dobro urađeno, u Zeničko-dobojskom kantonu se na ostvarenu dobit plaća 0,07%. Znači firma koja je ostvarila 100.000 KM dobiti plaća taj iznos. Ovdje je na ostvaren prihod, znači ukupan promet firme plaća se 0,07. U Sarajevskom kantonu je ovaj zakon stavljen van snage. Znači oni su donijeli korona zakon i stavljen je van snage u toku ove godine za pravna lica, zanatske i ugostiteljske radnje. Pravna lica podrazumijevaju sva lica koja se bave određenom djelatnošću i nisu obavezni, odnosno ne plaćaju ovu vrstu naknade. U Hercegovačko-neretvanskom i Zapadnohercegovačkom nema tog zakona i uopšte ne plaćaju tu vrstu naknade. Ja se mogu složiti da

trebaju u normalnim uslovima da plaćaju pravni subjekti koji imaju koristi koji se bave drvno prerađivačkom djelatnošću ili imaju koristi od tih šuma Federacije BiH, pa da im se obračuna, odnosno da plaćaju te doprinose. Druga stvar, a to je isto nadležnost kantonalne Skupštine, članarina za Turističku zajednicu. Ne znam vjerovatno je rijetko ko upućen i involviran u to sve, ali nama je nametnuto da plaćamo članarinu. Ja kada govorim ja uzimam kao primjer moju firmu i tako je svagdje niko nije aboliran od bilo čega. Da bi plaćao članarinu trebao bih se učlaniti u nešto, a niko nije član Turističke zajednice, a ista je situacija na osnovu ostvarenih prihoda ukupnog prometa po završnom računu dužan je pravni subjekt obračunati naknadu u visini od 0,035% i izvršiti uplatu Turističkoj zajednici Tuzlanskog kantona tom koji jeste. Ja smatram nije to ni problem, nije ni teško i ako ne može trajno da se ukinu, u toku trajanja ove ekonomske krize da se stave ove tačke zakona van snage. Znači da privrednici na nivou Tuzlanskog kantona budu oslobođeni ovih plaćanja. Na početku sam zaboravio da kažem ovu inicijativu sam podnio i smatram da će uroditi plodom, jer me ohrabrila informacija da je inicijativa koju je ovo Općinsko vijeće podnijelo prije tri mjeseca, a upućena je prema Elektroprivredi BiH, djelimično je urodila plodom. Smatram da je ovo Vijeće učestvovalo 1% i 1 % u donošenju te odluke. Načelnik je dao informaciju da je Elektroprivreda obavijestila da će u što skorije vrijeme otvoriti odjeljenje podružnice ili poslovnu jedinicu na području općine Doboj Istok. Smatram da smo mi onom inicijativom koju smo uputili dali doprinosa da dođe do realizacije ovoga zahtjeva. Ako bude trebalo nekakvih pojašnjenja što se tiče ove inicijative ja stojim na raspolaganju, ali mislim da je obrazloženje jasno. Kantonalna Skupština donosi odluke i ne vidim razloga zašto ne bi i zašto nije do sada donijela takvu odluku, jer stvarno koliko god to zvučalo beznačajno to su ogromni nameti pored svih ostalih, pored plaćanja PDV, pored plaćanja indirektnih poreza, pored plaćanja doprinosa na plate, pored plaćanja naknada za zaposlene i pored ovih stvari vjerujte mi da ispadne da ako firma i ostvari neku dobit da mora da potroši. Ja sam pravio analizu unutar svoje firme i da nema ovoga ja bih mogao zaposliti otprilike 2,5 do 3 radnika. Znači da budem oslobođen ovih davanja koje smatram da nisu bar u ovom momentu potrebna.“

Emira Karić, predsjednica kluba vijećnika SDP: „Selamim i pozdravljam prisutne. Ja ću se prije svega osvrnuti na vašu vijećničku inicijativu ako imam pravo. Jako mi je drago kada neke stvari idu iz sale Općinskog vijeća prema višim nivoima i to treba da bude praksa, jer mi smo najbliži kontakt građana i mi znamo šta ih boli. Ima tu mnogo stvari koje bi se mogle predložiti, pa između ostalog i te neke markice kada je u pitanju zdravstveno osiguranje, je ako ja plaćam zdravstveno osiguranje je li stvarno potrebno da se ide uplatiti tih nekih minimalnih u odnosu na plaćanje zdravstvenog osiguranja. I to bi trebala biti možda zajednička inicijativa svih klubova. Zaista podržavam, lijepo ste obrazložili i ja takođe imam jednu vijećničku inicijativu, a ona se odnosi na naš nivo. Predlažem da se komunalna taksa umanji za 50 % u narednom periodu u 2020. godini na području općine Doboj Istok. Razlog, nije to mali znak pažnje, ali jeste mali znak doprinosa, kao što ste rekli, u novonastaloj ekonomskoj situaciji.“

Selmin Karić, vijećnik SDA: „ Uvaženi predsjedavajući, zamjeniče, kolege i kolegice vijećnici, načelnice, nema saradnika, predstavnici medija esalamu alejkum i dobar dan. Malo bi se osvrnuo na ove Izetove inicijative, koje su izuzetno dobre i ja ih podržavam. Možda par nekakvih obrazloženja vezano za naknadu za šume ona je 0,04 % na prihod na našem Kantonu. Bila je 0,05% i prošle godine su išle izmjene tog zakona i smanjena je na 0,04 %. Zakon je bio federalni i prije 3 – 4 godine Ustavni sud je donio odluku da je zakon neustavan. Mislim da je bila uredba, imala je vremensko ograničenje i prestala je da važi, tako da su uglavnom svi kantoni donijeli te svoje zakone vezano za šume i tu naknadu. Odlična je inicijativa, ali ja čisto sumnjam da će to proći, jer su prošle godine išle izmjene, bila je 0,05 %, a sada je 0,04 %. Namet je stvarno velik, a vezano za Turističku zajednicu 0,035 % za našu općinu, a Gračanica je 0,04 %, čini mi se, a zavisi od turističkog razreda kojem pripada. Znači izuzetno veliki parafiskalni nameti. Kada je u pitanju taksa poreske ona je bila 20 KM, odnosno 15 + 5 KM i to 5 KM je ukinuto, čini mi se prošle ili pretprošle godine, kada su išle izmjene vezano za te takse. Mjesečno u firmi gdje ja radim bude po 5 – 6, pa i 10 zahtjeva. Kada je u pitanju Uprava za indirektno oporezivanje 20 i 10 KM, znači 30 KM je taksi. Isto je na uvjerenju o izmirenim obavezama neki dan se pokušalo sa izmjenama zakona da se prolongira samo plaćanje PDV do kraja mjeseca i to nije prošlo. Vrlo teško je, ali podržavam sve ove inicijative i dajem punu podršku da se upute ka višim nivoima Skupštini Tuzlanskog kantona, a ona da dalje proslijedi.“

Dr. Ferid Konjić, predsjedavajući Općinskog vijeća: „ Ima li još diskutantata? Nema. Dajem na izjašnjavaње inicijativu koju je podnio Izet Hodžić:

Podnosim vijećničku inicijativu i molim kolege vijećnike da podrže ovu moju inicijativu i da donesemo zaključak vezano za istu. Inicijativa se sastoji iz tri segmenta, a smatram da bi ovu inicijativu, odnosno zaključak trebalo uputiti svim općinskim, odnosno gradskim vijećnicima na području Tuzlanskog kantona, kao i Skupštini Tuzlanskog kantona (kao najvišem zakonodavnom organu na Kantonu), a Skupština bi dalje uputila organima čija je nadležnost rješavanje ovog problema (Parlament Federacije BiH, Upravni odbor Federalne poreske uprave i Upravni odbor Uprave za indirektno oporezivanje).

Inicijativa se sastoji iz sljedećih elemenata:

- *Da se donese odluka o ukidanju taksii, odnosno naknada koje se plaćaju prilikom izdavanja uvjerenja o izmirenim obavezama za poreze i doprinose (taksa u vrijednosti od 15,00 KM) zatim taksa za izdavanje liste uposlenih lica datog društva od strane Federalne poreske uprave.*

Smatram da su to dodatna opterećenja privrednim licima i ostalim poslovnim subjektima u ovim teškim ekonomskim prilikama.

- *Da se donese odluka o ukidanju taksii, odnosno naknada koje se plaćaju prilikom izdavanja uvjerenja o izmirenim indirektnim porezima od strane Uprave za indirektno oporezivanje (taksa u vrijednosti 20,00 KM).*

Razlozi za donošenje ovakve odluke su identični kao i u prethodnoj tački.

- *Predlažem da se uputi zahtjev Parlamentu federacije da donese odluku o ukidanju izdvajanja naknade za šume Federacije BiH i vode Federacije BiH i članarine za Turističku zajednicu Tuzlanskog kantona (ovu odluku donosi Skupština Tuzlanskog kantona).*

Ovakve naknade imaju atak i otežavaju rad poslodavcima, tj. privrednicima, odnosno velikom broju privrednih društava na nivou opštine, kantona i Federacije BiH. Iz vlastitog iskustva u okviru svog privrednog društva mogu potvrditi i sa sigurnošću reći da su to veliki novčani izdaci koji ukoliko ne bi postojali mogli se usmjeriti u sam razvoj privrednog društva, zapošljavanje radnika i drugo. Pretpostavljam da će sa ovom inicijativom da se slože svi privrednici jer sleduju ih identična izdvajanja.

Dajem ovu inicijativu na izjašnjavaње. Ko je za?

Glasanje: ZA – 17, PROTIV – 0, UZDRŽANIH – 0.

Napominjem da se sjednici priključila Senada Džanić.

Imamo drugu inicijativu koju predlaže vijećnica Emira Karić:

Predlažem da se komunalna taksa umanji za 50 % u narednom periodu u 2020. godini na području općine Doboj Istok.

Ko je za ovu inicijativu?

Glasanje: ZA – 15, PROTIV – 0, UZDRŽANIH – 2.

USVAJANJE DNEVNOG REDA

Dr. Ferid Konjić, predsjedavajući Općinskog vijeća: „ Dobili ste prijedlog dnevnog reda, a imamo i dopunu dnevnog reda i imamo skidanje jedne tačke sa dnevnog reda. Naime, iz Suda iz Gračanice juče su zvali zbog korone neki problem imaju i ne mogu poslati predstavnika i onda smo se dogovorili da će se ta tačka odgoditi za sljedeću sjednicu. Imamo prijedlog za proširenje dnevnog reda sa dvije tačke.

U skladu sa članom 56. Poslovnika o radu Općinskog vijeća Doboj Istok predlažem da se na dnevni red Općinskog vijeća stave sljedeće tačke:

1. *Razmatranje prijedloga Rješenja o razrješenju predsjednika i članova Upravnog odbora Javne zdravstvene ustanove Dom zdravlja Doboj Istok,*
2. *Razmatranje prijedloga Rješenja o privremenom imenovanju Upravnog odbora Javne zdravstvene ustanove „Dom zdravlja“ Doboj Istok.*

Obrazloženje:

Razlozi za proširenje dnevnog reda je što su dva od tri člana Upravnog odbora Javne zdravstvene ustanove Dom zdravlja Doboj Istok dali ostavke na funkcije koje obavljaju i time je onemogućen rad Upravnog odbora zbog nepostojanja propisanog kvoruma za rad, pa je potrebno postojeći odbor razriješiti i imenovati privremeni Upravni odbor do izbora novog upravnog odbora u skladu sa Zakonom o ministarskim, vladinim i drugim imenovanjima Federacije Bosne i Hercegovine.

S poštovanjem!

Načelnik općine Kemal Bratić.

Znači imamo skidanje jedne tačke i dopunu sa dvije tačke. Ima li ko potrebu nešto da kaže?“

Emira Karić, predsjednica kluba vijećnika SDP: „ Meni lično nije jasno ovo privremeno imenovanje, a objasniti ću zašto. Ovdje vidimo da su predsjednik i jedan član dali ostavke, međutim Husaković Almir nije dao ostavku. On nije imenovan ispred reda osnivača nego je prijedlog bio od Ministarstva, odnosno viših nivoa. Ja smatram da je ovo trebalo da bude dopunjavanje trenutnog Upravnog odbora, a ne razrješavanje i privremeno imenovanje. Molim da mi se objasni kako bi išli u tu legalnu proceduru, jer mislim da je stvar u dopuni. Ako su ovi dali ostavku zbog čega da bude Husaković Almir kažnjen ako je čovjek imenovan i hoće da radi, jer nije dao ostavku. Znači trebao se dati određeni rok, jer imamo ispred reda radnika i ispred reda osnivača i mi smo sada po meni trebali pričati, ja ne znam zbog čega se imenovao Husaković Almir ako on mora biti razriješen, jer dvojica daju ostavku. Isto tako ti nadzorni i upravni odbori od tri člana nisu dobra stvar, nego najmanje pet članova i onda se tu može i bolje raditi i ovakve stvari prevazići.“

Dr. Ferid Konjić, predsjedavajući Općinskog vijeća: „Ovo su zakonske regulative i Almir je imenovan u redovnoj proceduri i mi sada samo možemo izabrati privremeno, jer se u redovnoj proceduri mora raspisati konkurs, a mi sada nemamo Upravnog odbora. Ovaj je redovan i mi sada dopunjavamo na ograničeno vrijeme i na sve, ne možemo praviti kombinaciju, bar ja to tako razumijem. Znači imamo Upravni odbor koji je izabran na konkursu i od tri dva člana su podnijela ostavku. Može li funkcionisati Upravni odbor? Kako se premoštava? Premoštava se na ograničeno vrijeme i na 90 dana se bira privremeni Upravni odbor. Bira ga organ koji ga imenuje, a mi smo imenovali sve. Prijedlozi su jedno, ali imenujemo mi. Imamo pravnik i neka nam pravnik pojasni.“

Omer Hadžić, sekretar općine: „ Pozdravljam i selamim sve prisutne. U obrazloženju je rečeno koji je pravni osnov da Općinsko vijeće imenuje i razrješava upravne odbore na prijedlog Općinskog načelnika. Imate prijedlog Općinskog načelnika da se razriješe članovi bez obzira iz koje strukture. Ovi su dali ostavke prije, jer bi uslijedilo isto razrješavanje kao i ovo. Ima razrješavanje na svoj lični zahtjev i ima razrješavanje koje nije na lični zahtjev. Navedeni su razlozi zašto se razrješuje prije isteka mandata i treći član. Čim se razriješi ovaj Upravni odbor, nema Upravnog odbora i moraš imati privremeni upravni odbor od tri mjeseca da se izabere u redovnoj proceduri kako slijedi. Inače svim ovim upravnim i nadzornim odborima ističe mandat krajem godine.“

Emira Karić, predsjednica kluba vijećnika SDP: „ Da kažem pravniku i vama, postojali su vakuum prostori u svim ustanovama i institucijama gdje u određenom periodu nema nadzornog odbora. Postojale su takve stvari, postojala je i naša škola koja 3 – 4 mjeseca nije imala školskog odbora, nastupio je taj vakuum prostor gdje vlada nije mogla imenovati, postoji vakuum prostor i u vlasti kada se ne može dogovoriti itd. Ja sam samo išla iz ljudske namjere ako čovjek zvani Husaković Almir, kao član Upravnog odbora Doma zdravlja, nije dao ostavku onda po meni ide dopuna. Sve je to iz tačke gledišta i ja mogu navesti razloge i nemojte mi inteligenciju, jer čitam ja pravne osnove i mogu sada vam dati pravni osnov na svoj prijedlog i reći i Vijeće ministara je u vakuum prostoru, pa nije donesen novi prijedlog Vijeća

ministara. Mislim da se ovdje mogao napraviti jedan vakuum prostor kojemu je trebalo da uposlenici imenuju svog člana i mi bi danas samo trebali imenovati ispred osnivača. Nije u redu da se jedan član makne ako on to ne želi.“

Dr. Ferid Konjić, predsjedavajući Općinskog vijeća: „Meni je žao da vijećnica nas poziva na vakuum prostor. Ako mi imamo rješenje, riješit ćemo. Ovo neka shvata svako za sebe, ali ja se nikada ako imamo neko rješenje neću pozivati vakuum prostor, jer to nije u redu.“

Selmin Karić, vijećnik SDA: „Decidno pišu razlozi za donošenje i mislim da nema potrebe ni objašnjavati. Imamo ovdje prijedlog, a Vijeće će donijeti odluku, odnosno rješenje da li će ili neće i ja ne vidim razloga za vakuum ni za bilo čim. Znači mi ćemo donijeti tu odluku da li je ili nije, hoće li ili neće.“

Safet Smajilbašić, vijećnik SBiH: „Sve vas selamim. Sada sam se javio vezano za ovo i neću se više javljati, a normalno glasat ću onako kako mislim. Mislim da obrazloženje za smjenu trećeg člana nije u redu. Predlagač kaže: takođe je mišljenje da treba razriješiti Husaković Almira, člana Upravnog odbora Doma zdravlja, zbog neuspješnog rada ustanove kojom je upravljao i loše saradnje sa osnivačem. A istovremeno predlagač predlaže čovjeka koji je bio pomoćnik direktora u Domu zdravlja. Mislim da je ovo politički obojeno i zbog toga se on mijenja.“

Emira Karić, predsjednica kluba vijećnika SDP: „Da li mi možete samo još ovo objasniti ako mi glasamo za ovo rješenje i privremeno imenovanje da li time, po ovome što je upravo Safet rekao, mi Husaković Almira ovdje optužujemo kao jedinog krivca za određene negativne stvari koje se dešavaju u Domu zdravlja, jer je time i naveden ovdje. Ako je tako onda u redu idemo se dogovoriti da on bude ili žrtveno janje ili šta već, ali da stojimo iza toga i da snosimo posljedice. Znači u eter će ići je Husaković Almir kriv i za nelegalne radnje i za sve ono što ne valja u Domu zdravlja, jer ste tako naveli.“

Dr. Ferid Konjić, predsjedavajući Općinskog vijeća: „Mi sada diskutujemo hoće li ići tačka na dnevni red, a kada dođe tačka na dnevni red onda možemo diskutovati o svim tim stvarima. Znači ovdje je samo prijedlog dopune dnevnog reda i nemojmo brkati stvari. Ovo je prijedlog dopune dnevnog reda i ispoštovane su sve procedure, ali proceduralno mi se moramo izjasniti hoće li ići tačka na dnevni red. Kada dođe tačka na dnevni red onda ima pravo diskutovati ko šta hoće i govoriti o svemu.“

Emira Karić, predsjednica kluba vijećnika SDP: „Pričat ću polaganije da se razumijemo, mi imamo pravo prije stavljanja prijedloga proširenja davati svoja mišljenja da li je dobro da tačka ide na dnevni red i upravo to radimo. Mi ne radimo pretres tačke, mi objašnjavamo razloge zbog čega tačka ne bi trebala ići na dnevni red. Navela sam razlog da smatram da nije stvar u privremenom finansiranju nego da bi se eventualno na nekom vijeću ili na nekoj hitnoj sjednici izjašnjavali o dopuni. Zato ja diskutujem i mislim da imam dovoljno staža u Vijeću da neke stvari razumijem i da me zbog tih stvari ne opominju.“

Dr. Ferid Konjić, predsjedavajući Općinskog vijeća: „Nikakav problem neka svako iznese svoje i ja sam svoje rekao. Ima li još diskutacija? Ne vidim prijavljenih. Imamo prijedlog ovih 11 tačaka i ove dvije tačke kao dopunu. Ko je za da ove dvije tačke idu na dnevni red?“

Glasanje: ZA – 9, PROTIV – 1, UZDRŽANIH – 7.

Znači ove dvije tačke idu na dnevni red i sada imamo 10 i ove dvije tačke to je 12 tačaka, obzirom da se jedna tačka briše. Ko je za kompletan dnevni red?“

Glasanje: ZA – 11, PROTIV – 0, UZDRŽANIH – 6.

Ove dvije tačke idu kao 10 i 11. tačka.

Usvojen je sljedeći:

DNEVNI RED

1. Razmatranje i usvajanje Konačne rang liste za dodjelu stipendija redovnim studentima,
2. Razmatranje i usvajanje prijedloga Konačne odluke o dodjeli stipendija redovnim studentima dodiplomskog studija za akademsku 2019/2020. godinu,
3. Razmatranje i usvajanje Programa obilježavanja 4. jula Dana brigade,

4. Razmatranje i usvajanje Izvještaja o radu JU za predškolski odgoj i obrazovanje „Dječija radost“ Doboj Istok za 2019. godinu,
5. Razmatranje i usvajanje Izvještaja o radu JZU Dom zdravlja Doboj Istok za 2019. godinu,
6. Razmatranje i usvajanje Izvještaja o radu JU Centar za socijalni rad Doboj Istok za 2019. godinu,
7. Razmatranje i usvajanje Izvještaja o radu Općinske izborne komisije Doboj Istok za 2019. godinu,
8. Razmatranje i usvajanje Izvještaja o radu JKP „Čisto“ d.o.o. Doboj Istok za 2019. godinu,
9. Razmatranje i usvajanje Izvještaja udruženja građana o utrošku dodijeljenih budžetskih sredstava za 2019. godinu sa završnim računom,
10. Razmatranje i usvajanje prijedloga Rješenja o razrješenju predsjednika i članova Upravnog odbora Javne zdravstvene ustanove Dom zdravlja Doboj Istok,
11. Razmatranje i usvajanje prijedloga Rješenja o privremenom imenovanju Upravnog odbora Javne zdravstvene ustanove „Dom zdravlja“ Doboj Istok.
12. Razmatranje i usvajanje Informacije o izvršenju budžeta općine Doboj Istok za period januar – mart 2020. godine.

REALIZACIJA DNEVNOG REDA

Ad. 1. Razmatranje i usvajanje prijedloga Konačne rang liste za dodjelu stipendija redovnim studentima.

Dr. Ferid Konjić, predsjedavajući Općinskog vijeća: „ Materijal ste dobili, tačku dajem na diskusiju.“

Izet Hodžić, predsjednik kluba vijećnika GDS i nezavisni vijećnik Sajib Mešić: „ Iskoristio bih priliku, pošto je načelnik stigao da i njega poselamim. Kao predsjednik Komisije za mlade osjećam potrebu da dam dodatna obrazloženja, ako od strane vijećnika bude upita, što se tiče ovog javnog konkursa da imate potpuniju sliku, mada prema dokumentima koji ste dobili i zapisnicima komisije mislim da nema neke potrebe da se nešto posebno priča. Prije svega na samom početku želim da kažem da je sastav Komisije radio sa tri člana: moja malenkost, Smajl Hodžić i Ermin Mujkanović uz pomoć sekretara Općine i tehničkog sekretara kojima se ja iskreno zahvaljujem na nesebičnom doprinosu u radu Komisije. Komisija se prvi puta sastala 10. februara i donijela zaključak o upućivanju istog Općinskom načelniku za raspisivanje javnog poziva za dodjelu stipendija za studijsku 2019/2020. godinu. Normalno javni poziv je raspisan i po okončanju predviđenog roka Komisija se sastala 06.05. i razmotrila sve ponude. Pristigle su 24 ponude na javni konkurs. Komisija je konstatovala da jedna ponuda ne ispunjava uslove predviđene pravilnikom i da pomenuti student ovdje u zapisniku ne studira na univerzitetima, odnosno na fakultetima u Bosni i Hercegovini nego u inostranstvu. Poslije toga mi smo krenuli sa bodovanjem pristiglih ponuda, napravili preliminarnu rang listu i donijeli odluku da se ta rang lista istakne kao i do sada na oglasnoj tabli općine Doboj Istok, da se uputi svim mjesnim zajednicama općine Doboj Istok i da se postavi na web stranicu Općine Doboj Istok i da bude rok 8 dana. Po okončanju tog vremenskog perioda 26. maja sazvana je komisija ponovo i samim tim što na preliminarnu rang listu nije bilo primjedbi mi smo tu listu pretočili u prijedlog koji smo uputili Općinskom vijeću na razmatranje i usvajanje. Sve piše, a možda sam nešto propustio da kažem. Ja sam prezadovoljan radom svojih kolega članova komisije i mislim da radimo dobar posao. Ovaj saziv komisije je čitav mandatni period radio u okrnjenom sastavu, jer je 40 % članova ove komisije falilo, ali smatram da smo donosili pravilne i pravedne odluke onako kako su i trebale biti donešene. Pozivam kolege da ovaj prijedlog liste usvoje. Dužan sam da napomenem da sam tražio informaciju od općinske službe i za proteklu akademsku godinu isplaćene su sve stipendije.“

Emira Karić, predsjednica kluba vijećnika SDP: „ Prije svega mi je drago što nema nekih žalbi, upita itd. što znači da je po meni pravilnik jasan i decidan, a pri tome i pravedan tako da dobivamo lijepu sliku. Zahvaljujem se komisiji, jer naravno treba pohvaliti nekoga ko obavi korektno i dobro posao, a s tim bar ja nemam problema. Naravno, pravilnici i prečišćavanje teksta uvijek će se mijenjati. Evo vidim Hodžić Mirza, mada znam ko je i šta je, ali kada vidim ovu 10 odmah mi naumpadne da bi se za tu ocjenu možda mogao i povećati taj iznos stipendije kroz sam pravilnik. Takođe mi je drago zbog uvođenja ovog prioriteta. Ja sam bila svjesna, ne znam da li su drugi bili svjesni, da je to jedan jako dobar eho, samim tim pogledajte da imamo 6 prioriteta, a može se čak dogoditi da budu svi prioriteti, daj Bože, jer bi to bio

jako jako dobar uspjeh. Jest da je tu tri državna i tri privatna, ali o tome nećemo ni raspravljati, jer to danas nije tema, jer imamo privatne i državne sve institucije, a kamoli fakultete. Ja u svom okruženju poznajem dosta studenata koji se upravo bore za ovo za iduću godinu. Ne znam čiji je to prijedlog bio i ja se zahvaljujem, jer nismo svjesni koliko smo dali motivaciju našim studentima. Nije neprimjetno da li student ima 6 iz nekog predmeta ili je dobio 9 ili 10. Bar na državnim fakultetima za 9 i 10 zaista se student mora potruditi i proširiti svoje vidike i svoje znanje što doprinosi i našoj lokalnoj zajednici i našoj državi. Ono što jeste žalosno je što ste radili kao komisija samo od vijećnika, a to je opet jedno drugo pitanje. Smatram da bi se u idućem mandatu te stvari trebale popraviti i trebao bi se iznos za komisije povećati. Mislim da danas neće niko za 30 KM, kao i kada imamo izbore, sve su to stvari koje moraju motivaciono djelovati. Ako plaćamo člana komisije koji nije iz reda vijećnika 100 KM moramo platiti dodatno i vijećnika, jer bi ovaj došao na komisiju za 1/3 mog vijećničkog paušala. To su realne stvari o kojima treba razmišljati ubuduće, ali o tom potom, jer mi smo na izmaku mandata. Ne događa se to samo na Komisiji za mlade, jer mislim da skoro nemamo članova iz reda građana koji dolaze na komisije. Tako samo radili i na komisiji za dodjelu priznanja nije bilo nikoga iz reda građana. Mislim da je to simptomatično i da treba o tome zaista povesti računa zbog čega građani ne žele dolaziti u ovu vijećničku salu. Kažem nije to tačka dnevnog reda. Ovo je dobro urađen posao i ispravan, ali stojim iza toga, kao što sam govorila na Kolegiju da bi se vremenska granica trebala pomjeriti. Mislim da bi trebali raditi u tom smjeru da studenti do decembra mjeseca mogu prikupiti svu dokumentaciju iz razloga što sa oktobrom, sa tim nekim zadnjim rokovima, oni u novembru mogu donijeti srednju ocjenu koja se ovdje boduje, a sve ostalo nije problem u bilo kojem roku. Tako da bi po meni mjesec mart možda bio krajnji rok u kojem bi studenti dobili stipendiju. Trebalo bi zaista ići u tom smjeru, jer nekako kada pitaš studenta kada si primio, u junu ili julu, malo je konfuzno, pa bar da se nada u martu, a mislim da je to moguće.“

Semir Halilović, vijećnik SDA: „ Poštovani predsjedavajući, načelnika nema, kolege vijećnici, predstavnici medija samo na dvije stvari da se ovdje osvrnem. Jedna je kao i uvijek da pohvalim rad ove naše komisije koja je zaista po meni jedna od najboljih. Ja sam jedne prilike rekao ne smijem reći najbolja komisija da se ne uvrijede druge, ali je zaista komisija koja radi profesionalno svoj posao i ne samo za ovu akademsku godinu nego i za sve druge dok je ovaj sastav radio. Druga stvar, možda ovako malo pažljivije čitam, a i Emira je nešto o tome govorila da vidimo da je u stvari ovo svojevrsna promocija naših škole i osnovne i srednje škole. Ja sam se zaista obradovao kada sam vidio, jer sam znao da su ovi neki od naših učenika koji su bili nekad u našoj školi dobri studenti, ali ovako vjerujte ja sam se iznenadio iz samog materijala. S tim u vezi bilo mi je zaista zadovoljstvo da vidim da jedan naš učenik, koji je inače bio učenik generacije u Mješovitoj srednjoj školi, ima na četvrtoj godini prosjek 10. To se rijetko desilo u istoriji, ne znam ima li uopšte zabilježeno u istoriji Elektrotehničkog fakulteta i ima li uopšte takvih ocjena. Bit ću subjektivan kad o tome govorim, ali u najmanju ruku obim obaveza koji ima student Elektrotehničkog fakulteta je zaista veliki i imati sve 10 je umijeće. Obzirom da se radi o djetetu moje uvažene kolegice Mirsade ja znam da je on neke ispite poništavao da bi došao do dobrog rezultata i rekao je da hoće to da uradi, jer neće da osramoti svoju školu. Šta bi bila sramota da bude i 9,8 a on je htio da ima najbolji rezultat. To je da imamo nekada u vidu kada razgovaramo o našim školama koliko kvaliteta izlazi iz njih.“

Izet Hodžić, predsjednik kluba vijećnika GDS i nezavisni vijećnik Sajib Mešić: „Ovo je dobra stvar, a evo i kolegica Emira je primijetila, a i mi na Komisiji smo primijetili da je iz godine u godinu sve više studenata sa ocjenom od 9 do 10. To je dobra stvar i dobar motiv. Ne čini mi se nego smo uradili pravu stvar kada smo u pravilnik uvrstili i taj dio. Normalno treba da se borimo, a nebitno je da li će izbora biti ili ne biti, ko god dođe koji sastav vijeća i koji sastav komisije, dobro je da ovi prijedlozi budu upisani i verifikovani. Normalno treba raditi na povećanju sredstava za dodjelu i ja sam prošle godine rekao da ako ne možemo pet stipendija da svake godine za jednu ili dvije povećavamo broj stipendija. Isto tako ja lično se zalažem u razgovoru sa načelnikom da se te stipendije ne dodjeljuju onako reda radi. Znači da postoji nekakva odgovornost onoga kome je data ta stipendija. Ja ne mogu tvrditi, ali postoji mogućnost da student na prvoj godini fakulteta napusti studije, a dobije stipendiju. Kada se potpisuju ugovori imamo te alate, ali ja nisam još saznao da se to desilo da je neki student vratio nešto. Ja kažem da postoji mogućnost, ne tvrdim da se to desilo, ali kažem da treba malo ozbiljnije pristupiti tome. Slažem se sa činjenicom, a i na Kolegiju smo prilikom pripreme da ovo Općinsko vijeće, raspravljali na ovu tematiku prilikom kreiranja dnevnog reda bio je isti prijedlog, a i Komisija je razmatrala tu činjenicu da bi trebalo prema naprijed pomjeriti raspisivanje konkursa. Razmišljanja su da ne može prije nego što se donese budžet i kada se usvoji budžet i ako se budžet donese kao što je do sada bila redovna praksa u decembru,

komisija u narednom sazivu bi trebala u januaru da sjedne i da zaključak načelniku da se raspiše javni poziv i onda bi po okončanju procedure, možda na martovskoj sjednici, mogli donijeti konačnu odluku.“

Hasan Hasančević, predsjednik kluba vijećnika SDA: „ Pošto prvi puta izlazim sve vas selamim i pozdravljam. Mislio sam da će kolega Semir kada je već izašao reći ili kolega Izet, ali evo zaključak kluba vijećnika SDA je takođe da se pomjeri tajming, vremenska distanca raspisivanja konkursa i zaključak većine u ovom Vijeću je isto takav. Imao sam potrebu da to kažem, svi smo znači istog stava da se pokuša iznaći rješenje. Ja mislim da i ovaj saziv može na jednoj od zadnjih sjednica da predloži to, a neki budući da razmatraju konkurs, jer mislim da je i to u skladu sa propisima, ali o tom potom.“

Dr. Ferid Konjić, predsjedavajući Općinskog vijeća: „ Sam pojam stipendije podrazumijeva nekakve odnose i vjerovatno bi trebalo da podrazumijeva i nekakvo zapošljavanje ili druge stvari. Ja sam podavno predlagao da bi to trebalo drugačije formulisati. Ja sam u svoje vrijeme imao kredit od opštine, napravi se pravilnik ko treba vratiti, koliko će vratiti i kada će početi vraćati. Na taj način se stvaraju nekakve druge obaveze, a iznašli smo način za izdvajanje ovih nadarenih što treba svakako izdvajati. Sve ove ostale morali bi vezati na nekakav drugačiji način i da smo to ranije počeli sada bi imali sredstava iz kojih bi mogli finansirati veći broj studenata, a na taj način stvaramo neku vrstu odgovornosti. Ja govorim iz svog iskustva da je u ugovoru stajalo ako završi na vrijeme, ako se zaposli u svojoj općini ima nekakve posvlastice, a ako ne onda ima veće obaveze da vraća. Kada se to sabere to opet nisu nekakva sredstva za onoga ko počne raditi da vraća ta sredstva, a ta se opet sredstva mogu vratiti u krug i možemo na neki način povećavati broj stipendija i vjerovatno iznos samih stipendija. To je ono što mi nikada nismo razradili. Stipendija bi trebala da podrazumijeva ako nekoga stipendiramo trebali bi da obezbjeđujemo u onom nekom smislu radno mjesto, znači nekakve obaveze. Ovo je nekakva pomoć studentima za vrijeme studiranja bez onih odnosa koje svako davanje nekakvih sredstava podrazumijeva. U ekonomiji za sve što se daje mora biti nekakva povratna informacija. Mi smo uveli i pojam bespovratnih kredita što nije kredit i to su te nekakve stvari. Mislim da ćemo u nekom periodu doći na to da ćemo morati na taj način da izdvojimo nadarene studente koje treba posebno nagrađivati. Za sve ostale treba ostaviti mogućnost da im se da sredstava da se mogu školovati, a kada dobiju plate da ta sredstva mogu vraćati i da bi se otvaralo za ostale studente.“

Emira Karić, predsjednica kluba vijećnika SDP: „ Ja ću se osvrnuti na taj vaš prijedlog da ga ipak malo razjasnimo. Imam i ja studenta i osjetila sam šta to znači, ljudi to je lični dohodak kada se plati stan i prevoz, pa bio u Tuzli ili Sarajevu to je jedan lični dohodak. Ovo što ste vi predsjedavajući predložili da se obaveže za iznos od 100 KM ja baš i nisam za. Upravo 100 KM je na današnjem vaktu kada govorimo koliko košta jedan student zaista pomoć. Međutim ako se bude radilo o nekom iznosu koji će obitelj dobro pomoći, npr. 50% i to bi bilo nešto 300 – 400 KM da se kreditira taj student i to je u redu. Međutim za 100 KM ja zaista ne bih obavezivala, jer to je jedna pomoć studentima. Opet kažem molim vas i vi u svojoj sredini, jer nisu svi upoznati, jer nemamo sredstva javnog informisanja, a ukinut nam je prijenos Radio Gračanice, kao i najminimalniji prijenos sjednica na TV i to se u ovoj vlasti neće nikada ni dogoditi, pa kako me god shvatili. Zaista širite priču, može i kroz škole, jer nisu svi upoznati da ako imaš prosjek 9 da si prioritet. Ja širim i vidim par porodica u kojim idu ispiti gdje kažu moraš moraš naguraj na devetku da malo i karikiram i parafriziram što je jako jako pozitivno. Vi niste svjesni da je velika razlika znanja između šestice i devetke, jer ipak se učenik mora potruditi za tu veću ocjenu. Kažem širite tu priču, pa makar imali sve prioritete.“

Dr. Ferid Konjić, predsjedavajući Općinskog vijeća: „ Ja sam i rekao ovo je pomoć. Kada se uvedu mehanizmi, onda to ne bi bila pomoć to bi bio kredit koji bi stvarno mogao omogućiti daleko veći iznos koji bi omogućio lakše i lagodnije školovanje. Ja sam to rekao prije 10 - tak godina i ostali smo na tome, a vjerovatno ćemo nekada morati sigurno, a cifre moraju biti 300 – 400 KM najmanje. Znači trebamo pomoći nadarenim i tu nekakvu pomoć nadarenima moramo izdvojiti, a sve ostale ko hoće da studira da mu se omogući način da mu se pomogne u tom smislu da će dobiti kredit koji nema kamate i koji će vraćati kada počne zarađivati. Pored ovih prijedloga o kojima je Izet govorio i o čemu smo pričali na Kolegiju, trebamo raditi i u tom pravcu, jer ćemo na taj način stvoriti veća sredstva i više će se moći studenata stipendirati. Ima li još diskutantata? Ako nema dajem na izjašnjavanje. Ko je za?“

Glasanje: ZA – 17, PROTIV – 0, UZDRŽANIH – 0.

Ad.2. Razmatranje i usvajanje prijedloga Konačne odluke o dodjeli stipendija redovnim studentima dodiplomskog studija za akademsku 2019/2020. godinu.

Dr. Ferid Konjić, predsjedavajući Općinskog vijeća: „Materijal ste dobili, tačka je vezana za prethodnu. Tačku dajem na diskusiju. Ne vidim prijavljenih. Ko je za?“

Glasanje: ZA – 17, PROTIV – 0, UZDRŽANIH – 0.

Ad.3. Razmatranje i usvajanje Programa obilježavanja 4. jula Dana brigade,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata. Ko je za?“

Glasanje: ZA – 17, PROTIV – 0, UZDRŽANIH – 0.

Ad.4. Razmatranje i usvajanje Izvještaja o radu JU za predškolski odgoj i obrazovanje „Dječija radost“ Doboj Istok za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Ja mislim da vam ne pravim problem ako pozitivno razgovaramo o vašem izvještaju, ali moram zaista i ovaj puta. Niti jedan izvještaj, a ja sam čak čitala nešto vezano za Skupštinu TK, nije ovako transparentan sa ovakvim tokom događaja. Ja zapravo nemam vas šta ni pitati, jer ste vi u svom izvještaju sve rekli vezano i za konkurse. Hoću da kažem u našoj državi sve je crno, ali ima ono svjetlo i stvarno ću vam reći vi ste to malo svjetlo na kraju tunela iz razloga što je to to što mi zahtijevamo od jedne ustanove. To je jedan redoslijed, pa ko radi, ko je zaposlen, pa kako hrana, sve ste nam rekli i nema nekih dodatnih pitanja. Uvijek može biti i ja sam nešto zabilježila da dodatno raspravimo. Rekli ste u sljedećim mjesecima –oktobar došlo je do blagog osipanja broja djece u obdaništu privatni razlozi roditelja, gubitak posla itd. Pitat ću vas vezano za 2020. godinu, a pohvalila sam izvještaj za 2019. godinu. Da li očekujete, a vjerovatno će se dogoditi još veći pad, ne ovaj mjesec, nego idući i živi bili pa vidjeli, jer decembar, januar i februar bit će krizni mjeseci i bit će ljudi koji će se otpuštati sa posla i to su neminovne stvari. Da li će vam biti problem otplaćivati taj kredit? Ovdje ste naveli da je svakom roditelju teško je da prizna da je njegovom djetetu potrebna dodatna pomoć. Ovdje ste naveli da je 12 djece sa govornim poteškoćama. Takođe pozdravljam našeg logopeda koji radi i u osnovnoj školi, jer zaista zaista nismo svjesni, a pričala sam vam o tome da jedan dan ide u vrtić, nismo svjesni koliko je pomaka u svakom djetetu sa kojim 1 – 2 časa radi taj logoped. Bit će tema i Centar za socijalni rad i ja smatram da se logoped mora primiti na cijelu normu i da moramo predvidjeti sredstva u budućem i saživu i budžetu. Znači mora se zato što je na terenu veliki pomak koji je uradio jedan logoped koji ide u jednu općinu Doboj Istok. Ne znam je li on radio on –lajn i to ću pitati kada bude Centar za socijalni rad. Mislim da je tu napravio jedan propust i da je mogao sa video pozivima raditi i kontinuirano nastaviti rad sa djecom. Nisam htjela nikoga zvati i davati takve savjete, jer mislim da je svako organiziran za sebe. Kaže Skula Emiri je uručena zahvalnica za nesebičan rad i doprinos predškolskoj ustanovi. Čestitam zaista i mislim da od strane općine trebate dobiti sličnu zahvalnicu i priznanje.“

Selmin Karić, vijećnik SDA: „ Sve pohvale za izvještaj, jer je u izvještaju sve ono što je po mom mišljenju najbitnije. U ranijem periodu su bila problem djeca koja su na „čekanju“, a toga više nema i ja smatram da je to, po mom mišljenju, najveći uspjeh ove ustanove.“

Hasan Hasančević, predsjednik kluba vijećnika SDA: „Ja svaki puta imam neke emocije prema obdaništu, direktorica to dobro zna. Samo da kažem da je ovaj menadžment i sastav obdaništa i sada kao nekada prije imao dopuna i radio je izvanredne poteze i stvari sa djecom sa posebnim potrebama i bez logopeda. Ne umanjujem značaj logopeda, hvala Bogu da ima i daj Bože da ga ima svaka škola za sebe, ali

oni to kontinuirano rade godinama i oni znaju prepoznati problem. Govorim iz svog vlastitog iskustva, ispravili su moje rođeno dijete onoliko koliko su bile njihove mogućnosti u datom vremenu.“

Emira Karić, predsjednica kluba vijećnika SDP: „ Samo jedna ispravka to što ste spomenuli dijete sa teškoćama u govoru pogotovo sa manjim nije dijete sa posebnim potrebama, jer to može da se ispravi. Dijete sa teškoćama naravno spada u posebnu kategoriju o čemu vi razgovarate gdje se specijalno mora, jer se 90 – 99 % ispravi uz pomoć logopeda tako da prelazi u dijete koje je zdravo.“

Hasan Hasančević, predsjednik kluba vijećnika SDA: „ Da se ne udaramo terminima, jedno je pričati o terminima, a jedno je raditi sa djecom sa bilo kakvom poteškoćom. Vi to znate vjerovatno kada imate u razredu jedno sa x ili y, nije bitno, poteškoćom kako vam je raditi. Ja nisam ni rekao da je sa posebnim potrebama neko drugi ili neko treći, ja ne kategoriziram. Ja znam da se po zakonu ne smije ni kategorizirati dok se ne završi dijagnoza potpuna, pa komisija jedna, druga, treća i o tome ja sa vama mogu nadugo i naširoko razgovarati tako da se ne bi udarao sa terminima.“

Emira Karić, predsjednica kluba vijećnika SDP: „ Ne bih u tu diskusiju o djeci sa posebnim potrebama, jer smatram da svakom djetetu sa posebnim potrebama treba pomoć. Znači treba jedan asistent i za to bih se zalagala, jer to je idealna stvar. Ja govorim da ste malo umanjili, po meni, ulogu logopeda koja je veoma značajna, jer jedan logoped može ispraviti 90 % djece sa poteškoćama na općini Doboj Istok. O tome sam ja govorila. Žustro bi se zalagala za svako dijete sa posebnim potrebama, jer je to taj pravilni rad. Znači dijete sa posebnim potrebama koje nama asistenta u nastavi ti njemu puno i ne pomažeš. Nažalost, a zna i direktorica da svako dijete sa posebnim potrebama treba da ima svog posebnog asistenta i to bi tada bio najpravilniji rad. Ja samo govorim koliko je nekima možda beznačajna uloga, a zapravo je jako značajna uloga logopeda. Proširit ću priču koliko je lakša socijalizacija tom djetetu kada logoped krene u predškolski odgoj. Trenutno 50 % djece ima poteškoće u govoru kada dođe u prvi razred i vjerujte teža je socijalizacija. Zašto je teža socijalizacija? Djeca mu se i rugaju i zadirkuju, ono je nesretno i možda čak psihološki istraumirano itd. Koliko meni logoped kada krenem sa prvim razredom pomogne kada dijete iole ispravi, a najznačajnija po meni je uloga u predškolskom odgoju. Pri Domu zdravlja trenutno ne radi, jer nisu sva djeca obuhvaćena predškolskim i ako roditelj primijeti neka ga vodi jedan dan u Domu zdravlja, jer se vrlo efektivno može taj neki boljitak i samim tim doprinijeti. Imate djece koja se nikada ne isprave, a logoped zaista može sa tim svojim vježbama da doprinese, a imamo u srednjoj školi djece kojoj roditelj nije bio svjestan što ste vi dosta u svom izvještaju naveli. Daj Bože da ima roditelja koji su svjesniji i koji na taj način pomažu da priznaju ovo ili ono, jer dosta roditelja kaže ja nisam primijetio. Dijete muca u četvrtom razredu i mi malo pričamo o tome i kaže ja nisam primijetio i zato se slažem sa onim pasusom, a naravno mi nemamo pravo spočitavati.“

Hasan Hasančević, predsjednik kluba vijećnika SDA: „ Ne znam iz čega je uvažena kolegica izvukla da sam ja umanjio rad logopeda kada sam ja jednostavno želio da kažem i da pohvalim ustanovu da su oni to radili i prije onoliko koliko su bili u mogućnosti. Još da vam kažem, znam ja šta je rad logopeda, jer sam dvije i po godine svaki utorak i četvrtak posjećivao Korake nade u Tuzli sa svojim djetetom kod logopeda. Ja znam šta je to, tako da nikada ne bi umanjio, ne logopeda nego bilo čiji rad, a pogotovo od takvih ljudi kojima treba odati priznanje što su prihvatili poziv da rade sa takvom kategorijom ljudi i da pomažu kroz sve to.“

Safet Smajilbašić, vijećnik SBiH: „Čestitam direktorici koja je nosilac i najodgovornija osoba u Dječijem obdaništu u Maloj Brijesnici. Ovo je treći izvještaj Dječijeg obdaništa kako ovaj saziv razmatra i imamo zaista lijepe riječi hvale na račun rada tog obdaništa. Međutim, ja vjerujem da iz godine u godinu se povećava učešće u finansiranju Dječijeg obdaništa od strane lokalne zajednice. Bilo je tu jako teških vremena i vjerovatno iz tog razloga neke stvari su ostale i do dana današnjeg. Ovo je samo znak kako se sa relativno malim sredstvima, 223.000 prihoda u prošloj godini, mogu raditi i velike stvari. Prihod je nešto veći nego u 2018. godini i interesantno je da je učešće prihoda iz njihovih djelatnosti povećano sa 69 na 86.000, odnosno za 17.000 nominalno i to je u ukupnom njihovom prihodu negdje oko 38 % u odnosu na 2018. godinu kada je bilo 34 %. Bez obzira na njihov rad mi lijepo pogledamo i bilans stanja, pa oni koji uzmu bilans stanja mogu vidjeti da je u 2018. godini bilo 12.277 KM obaveza prema uposlenicima Dječijeg obdaništa. Da je sada sa 31.12. bilo još i povećano na 16.581 KM. Na jednoj strani hvalimo, a na drugoj strani vidim da ljudi nisu dobili ono što za svoj rad trebaju da dobiju. Trebalo bi na neki način

pokušati iznaći neke rezerve da te obaveze koje imaju prema uposlenicima, a vjerovatno i prema državi da se na neki način adekvatno valorizuju i namire. Ne možete me ubijediti da je 12.000 za plate vaše za mjesec dana. Koliko vas ima? Koliko sam vidio 700 – 800 KM je prosjek primanja. Ja se onda izvinjavam, ali bez obzira obaveze su evidentirane.“

Emira Skula, direktorica JU za predškolski odgoj i obrazovanje „Dječija radost“ Doboj Istok: „Predsjedavajući Općinskog vijeća, zamjeniče, Općinski načelnice, vijećnici selam alejkum i dobar dan. Hvala svima koji su pohvalili rad obdaništa, a ja kažem niko ne može sam to raditi, to je timski rad, vaša zasluga i zasluga zaposlenika. Kolegici Emiri da odgovorim. Uvijek u oktobru i novembru dođe do izvjesnog pada broja djece, a tako očekujemo i sada. I sada je manje djece, ali smo smanjili i broj zaposlenika. Mislim da neće biti problem za kredit, jer smo i u ovoj korona krizi uspjeli redovno isplaćivati kredit zahvaljujući naravno vama, jer smo redovno dobijali tranšu. Što se tiče logopeda stvarno je veliki doprinos i ja sam mišljenja kao i gospođa Emira da bi trebalo da bude na punoj normi, jer puno je pomogao djeci. Mi to svakodnevno radimo, ali nismo baš stručni kao što je logoped za rad sa djecom. Slažem se i sa Haskom, jer govor odgajatelja je uzor djeci, ali ima kod djece poteškoća. Termin djeca sa posebnim potrebama i djeca sa teškoćama u razvoju često mijenjaju. Dijete sa teškoćom trenutnom može biti dijete koje je jedinjak, koje je dobilo brata u porodici ili rastavljenih roditelja i nama tu pomaže asistent, a to znaju ovi koji rade u školi. Ako ima još nešto što trebam odgovoriti, ja bih se svima zahvalila:“

Dr. Ferid Konjić, predsjedavajući Općinskog vijeća: „Ne vidim više prijavljenih i dajem na izjašnjavaње. Ko je za?“

Glasanje: ZA – 17, PROTIV – 0, UZDRŽANIH – 0.

Emira Karić, predsjednica kluba vijećnika SDP, je zatražila pauzu.

Predsjedavajući je dao pauzu do 11,30 sati.

Ad.5. Razmatranje i usvajanje Izvještaja o radu JZU Dom zdravlja Doboj Istok za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Ja ću se prisjetiti izvještaja iz 2018. godine gdje je od strane svih nas vijećnika bilo pozitivnih kritika, da tako kažem, jer smo razumjeli da ste vi direktore krenuli, hajmo reći, u pravom smjeru i otklonuli dosta spornih stvari koje su bile vezane za Dom zdravlja. Mislim da je tada izvještaj bio jednoglasno usvojen i od strane Upravnog odbora i od strane nas vijećnika, a možete me demantovati. Ja ću krenuti od nekih primjedbi, a što se tiče glasanja vidjet ćemo na samom glasanju. Za razliku od prošle tačke dnevnog reda gdje smo imali usvajanje izvještaja našeg vrtića ovaj izvještaj smatram nedovoljno transparentnim. Naša direktorica, Mige izvini, ali ti kažeš da bi ja i ona trebale popiti kafu, pa ću ja reći malu doskočicu, voljela bih vidjeti kolega, vašu koju rečenicu u zapisniku i slobodno izađite i pohvalite nekoga, a na kraju krajeva i sjednica Vijeća je o tome da se diskutuje i raspravlja. Mislim da ste trebali biti malo transparentniji u mnogim sferama, ali krenut ću od konkursa koji je bio za inženjera medicinsko laboratorijske dijagnostike. Kažem naša uvažena direktorica je tačno navela kada je bio konkurs, ko se javio na konkurs, maltene koliko je bodova itd. Mi ovdje apsolutno o tome nemamo riječi, a mislim da je potrebno da neke stvari razjasnimo. Na ovaj konkurs se javila kćerka zlatnog ljiljana, to ja privatno znam da se javila i smatram da je ona trebala biti prioritet. Mislim da će to biti malo u medijima vezano za to Udruženje zlatnih ljiljana. Smatram da je ta djevojka trebala biti prioritet bez, maltene, bodovanja. Takođe čujem da je izašao novi konkurs i sada tražite šest mjeseci i samim tim ona ne dolazi u obzir da se javi na konkurs. Smatram i to neispravnim. Maltene na konkursima pojedinih naših ustanova napišete ime i prezime ko bi trebao biti primljen, ali ne možemo mi iz opozicije, osim ove diskusije, da utičemo na bilo šta, ali smatram sramotno da kćerka jednog zlatnog ljiljana nije mogla doći u bilo kakav optičaj. Lijepo ste ovdje naveli koji su vaši osnovni zadaci i rekli ste da treba trajno osigurati međusobno dobru komunikaciju, razmjene informacija i iskustva sa korisnicima zdravstvenih usluga, osnivačem itd. Slažem se itekako insistirati na ovom pasusu i mislim da se ide u našem Domu zdravlja prema tim nekim boljim i međuljudskim odnosima i međusobnoj komunikaciji.

Mene samo zanima – bilo je ispitivanje nepovoljnog uticaja okoline na zdravstveno stanje stanovništva. Opet se vraćam, trebalo je malo biti transparentnije šta se to ispitivalo, koji su omjeri i šta možemo iz tog ispitivanja shvatiti. Znači nije dovoljno samo to navesti. Takođe ima jedna vizija gdje kažete njegovati izvrsnost u radu, profesionalni razvoj svih radnika, timski rad i ljudskost u odnosima. Nadam se da ćete se u budućnosti držati upravo ove vizije. Kažem pomaci postoje, ali ići upravo u ovom smjeru kako bi bili što profesionalniji i sa što manje problema.“

Kemal Skopljak, vijećnik BPS: „ Pozdravljam sve prisutne pošto prvi puta izlazim za govornicu. I ja ću malo proći kroz ovaj izvještaj, jer tiče me se pošto radim u toj ustanovi i znam dosta stvari koje se gore događaju. Izvještaj je sročan tako kako jeste, nije loše sročeno i može se doći do određenih zaključaka. Iz ovog izvještaja se vidi da je obim posla stvarno povećan i da se u Domu zdravlja radi puno, u prošlog godini pogotovo. Možete uporediti broj usluga koje je napravio naš Dom zdravlja i broj usluga koje je Hitna uradila. Znači 31.000 usluga je samo Hitna uradila i ogroman posao je gore napravljen. Uslovi su djelimično popravljani i ima napretka, ali ima stvari koje treba unaprijediti i koje treba možda bolje raditi u našem Domu zdravlja i transparentnije gdje direktno može odlučivati upravo menadžment Doma zdravlja. Moja kolegica Emira se malo prije dodirnula jedne stvari koja i mene zaista kao borca, kao građanina Doboj Istoka boli. Znači ako se pojavi, a rijetko se pojavi, na nekom našem konkursu kćerka ili sin od našeg zlatnog ljiljana i ne dobije prioritet u prijemu na to radno mjesto, onda mi stvarno ne reagujemo kako treba, jer ne ispunjavamo ono što nam je naloženo od strane vlade, od strane ministarstva da ta djeca treba da imaju prioritet na bilo koji način. Ako je ta curica imala isto bodova kod famoznog zadnjeg intervjua ili razgovora sa drugim zašto na tom zadnjem intervjuu pada? To je pitanje za direktora. Imam još jedno pitanje direktoru. Sve je ovo lijepo i super što je odrađeno, a tiče se nabavke saniteta. Zar se nije moglo putem neke humanitarne organizacije ili Ministarstva zdravlja pokušati bar doći do sufinansiranja nabavke tog saniteta? Da se ne daju kompletne pare koje mi imamo u rezervi u Domu zdravlja za sanitet, a zna se čije su to pare. Naravno da su pare radnika, da je odvajano iz njihovih džepova i da faktički sami radnici uzimaju taj sanitet. Trebalo je možda pokušati, po mom mišljenju, stupiti u kontakt sa Ministarstvom zdravlja, humanitarnim organizacijama i naći neki projekat gdje će doći do sufinansiranja kako bi pomogli da dio sredstava ostane u Domu zdravlja. Imam još jedno pitanje za direktora. Zašto nisu vraćene dvije prostorije Hitnoj službi, a znamo da smo ovdje donijeli zaključak da to treba uraditi? Sam ovaj zadnji problem sa pandemijom je pokazao upravo ono što sam ja govorio vama ovdje cijelo vrijeme da te dvije prostorije puno znače Hitnoj službi. Vi znate svi da je najveći teret u Domu zdravlja podnijela Hitna služba za ova 2 – 3 mjeseca i da je sila poslova prebačena na Hitnu službu. Upravo zbog toga treba Hitnoj službi pomoći i vratiti im prostorije da imaju komfor, da imaju gdje ljudi raditi. Iskoristio bih još ovu priliku da se zahvalim svim radnicima Doma zdravlja doktorima, sestrama, tehničarima, pomoćnom osoblju za ova 2 – 3 mjeseca. Ogroman posao je urađen, dali su sve od sebe što su mogli i hvala im na tome.“

Mehmed Mehinović, predsjednik kluba vijećnika SBiH: „ Mnoge će iznenaditi što sam ustao, jer sam rekao da neću ništa diskutovati, međutim ne mogu da ne ukažem na nekoliko stvari. Naime, po meni ovaj izvještaj je dobro napravljen, ima dobrog kvantiteta. Da li ima kvaliteta, pa eto ima i kvaliteta, jer izvršena je misija koja je postavljena pred naš Dom zdravlja. Međutim zbog sitnica koje sam čuo oko tih stvari, ja ne znam kao građanin, a dali su mi za pravo da nešto prodiskutujem. Međutim, ja ću govoriti o finansijskom dijelu. Naime, vidite da je ostvaren prihod u iznosu od 2,5 miliona KM. Ostvareni prihodi su veći za 177.000, od toga prihodi od Zavoda zdravstvenog osiguranja TK su 2.138.000 KM. 2,5 miliona ne daje za pravo da se komotno ponašaju u Domu zdravlja, jer 2,5 miliona je ogromna para. Za uporedbu samo da kažem da Općina Doboj Istok nema toliko vlastitih sredstava i od PDV i od neposrednih poreza koje ima. Nema toliko vlastitih prihoda i sa donacijama veći je budžet, a Općina Doboj Istok su i sportski klubovi, kulturno – umjetnička društva, boračke organizacije i sve druge organizacije, poplave, klizišta i da ne nabrajam i treba biti majstor, pa izvesti vratolomije i iz 2 miliona i nešto podmiriti sve te obaveze. Ovu uporedbu pravim iz razloga, jer su u Domu zdravlja, kako kažu, ostvarena misija za koju su postavljeni, ali su zato fino i plaćeni i imaju bezbrižno finansiranje, nemaju nikakvih problema. Ne treba se plaho uzdizati uvijek se može bolje, ovo što su uradili dobro je, ali uvijek se može bolje. Nisam se bavio time i nisam znao da nije primljena kćerka zlatnog ljiljana i meni je to krivo i da padne na intervjuu i ne mogu reći da je završila fakultet, a da je na intervjuu puno lošija nego neko. Kao konzument, obzirom da sam hronični bolesnik i da sam konzument usluga zaista nemam primjedbi na neko ponašanje, sve je to na svom mjestu. Međutim ovi finansijski pokazatelji govore da radnicima treba reći da se ne mogu

uljuljkati, da ne mogu biti zadovoljni ni menadžment ni radnici, nego moraju adekvatno pružiti usluge, jer su posve dobro plaćeni i to bezbrižno plaćeni i nemaju nikakvih problema u finansiranju, jer 2,5 miliona dođe svaki puta na vrijeme. U Doboj Istoku dođu indirektni porezi u budžet općine, međutim sve ostalo visi u zraku. Evo nepogoda koliko hoćete i ja znam kakve su tu brige da se sve ispoštuje što ima. Ništa zlonamjerno nisam rekao, čak što više izvještaj mi se svidio otprilike i prema nekim je standardima prema kojim ja zamišljam da bude izvještaj, ali hoću da kažem ponovo uz ovakve finansijske rezultate ni menadžment ni radnici nemaju pravo da se uljuljkaju i moraju biti još bolji. Ove primjedbe koje govore za prijem radnika zaista ja to ne mogu opravdati nikako i ničim ne mogu opravdati.“

Dr. Ferid Konjić, predsjedavajući Općinskog vijeća: „ Ja ću govoriti u nekom drugom pravcu. Uloga Doma zdravlja je primarna zdravstvena zaštita. Nosilac aktivnosti te primarne zdravstvene zaštite su specijalisti porodične medicine, a trenutno u Domu zdravlja postoje dva specijaliste porodične medicine koji će za tri godine otići u penziju. Mi za tri godine nećemo imati ni jednog specijaliste porodične medicine. Da bude još gore, pričao sam sa direktorom, ne znam da li je ikad i kada je zadnji puta raspisana specijalizacija iz porodične medicine. Kaže da nisu zainteresovani, a ja ne mogu procijeniti da li je zainteresovan ako mi ne raspisujemo konkurs. Ove primjedbe nemojte misliti da ja to sada iznosim, ja sam ovo pominjao i ranije. Možda ćete se sjetiti da ja prije dvije godine nisam podržao izvještaj zbog ovih suštinskih stvari. 22 godine postoji specijalizacija porodične medicine koja traje tri godine. Ako je išlo po jednu godinu mi 7 specijalista porodične medicine smo mogli imati, a po standardima nas sleduje 7 timova porodične medicine. Kakva je razlika između specijaliste i ovoga doktora medicine, onda ne bi niko išao na specijalizaciju. Ne bih ni ja išao na specijalizaciju, ne bi ni direktor išao na specijalizaciju da se ne profitira. Specijalizacija je poslije fakulteta jedina temeljna edukacija koja garantuje daleko bolji rad. U samom početku je propagirana porodična medicina i tada je opisivano šta se može uraditi. Ja se nisam slagao sa nekim stvarima što su navodili da oni mogu raditi, ali sam ubijeden da ogroman broj usluga i intervencija mogu uraditi zbog kojih se pacijenti šalju u sekundarni, a pogotovo u tercijarni nivo zdravstvene zaštite. Mi imamo probleme u sistemu zdravstva zato što nije riješena primarna zdravstvena zaštita. Ovo nije problem samo našeg Doma zdravlja i ja sam rekao da nemam odgovornosti za Dom zdravlja u Gračanici ili Živinicama ili Tuzli, a ovdje imam odgovornost. Na tercijarni nivo koji je klinika, ja vam mogu tvrditi da 70% pacijenata koji dođu ili nije trebao doći ili nije adekvatno pripremljen da dođe na pregled kod specijaliste i subspecijaliste. To su opet u ovom sistemu ogromni troškovi i u samom sistemu zdravstva to je veliko opterećenje za pacijenta kada ga neko mora odvesti do Tuzle ili do Gračanice i da izdangubi cijeli dan zbog neke usluge koja bi se mogla ovdje uraditi. Ja tvrdim da ovom što ja radim, za sve manje operacije i pacijent kada izađe iz bolnice nema potrebe više da dođe na kontrolu, jer sve to specijalista porodične medicine može raditi. Onda možete misliti koji bi to sada bio benefit za pacijenta. Za tri godine funkcionisat će Dom zdravlja i bitno je da imamo na radnom mjestu nekoga i on će odraditi, a sada kako će odraditi, to je sada drugo pitanje. Mislim da je vrijeme da počnemo pričati o kvalitetu usluge. Ove stvari je vjerovatno trebalo ranije započeti raditi, ali mislim da je bolje i danas da se započne nego da to čekamo u neko dalje vrijeme, jer ćemo još više samo odlagati. Nažalost naš Dom zdravlja, grubo je to reći, pretvorio se u nekakav protočni bojler. Neko dođe ovdje zaposli se i odradi godinu i po do dvije godine dana i ode negdje dalje. Došli smo u situaciju da doktori sebi privatno uplaćuju specijalizaciju ili dajemo specijalizacije koje po standardima nas spada 10 %. Po ovom konkretnom pitanju ja nisam znao ko je sve konkurisao, ali znam da inženjer biohemije ili specijalista biohemije spada na 35.000 stanovnika. Da li nama treba specijalista ili inženjer u punom radnom vremenu, a vi u prosvjeti znate da ima 4 časa, pa onda negdje drugo. Malo sam pregledao pravilnik koji je usvojio ovaj Upravni odbor u junu prošle godine. Ja taj pravilnik ne bih mogao potpisati u ovom vremenu. To su suštinske zamjerke moje na rad u Domu zdravlja, a ne ulazim u ove neke sitne zamjerke nekome kako se ko odnosi. Nisu poredane stvari kako treba i mislim da je vrijeme da mi počnemo raditi stvari kako treba. Imamo mi tu dovoljno kadra koji zna raditi i koji može raditi, samo treba malo drugačije stvari poredati. Mi moramo težiti da u svakom timu porodične medicine treba da bude specijalista porodične medicine. Svi smo mi prijavljeni na nekog doktora porodične medicine ko god ima osiguranje. Hajmo banalizovati, imamo svog frizera kojem vjerujemo, imamo svog servisera za auto, a imamo li doktora kojem vjerujemo, doktora koji treba da brine o zdravlju. Sve polazi i završava se sa doktorom porodične medicine. Znači odatle se počinje i kod god hoće ode i šta god da radi ponovo se vraća kod doktora porodične medicine. Svjedoci ste da je na kantonalnoj skupštini usvojeno za zavod informatizacija, a to će biti još nekakav dodatni momenat gdje doktor porodične medicine može daleko više informacija o svakom pacijentu. Doktor porodične medicine treba da radi preventivne rane

skriminge i trebao bi za svakog svog osiguranika, odnosno onog ko je prijavljen, bar jednom godišnje posjeti ili zovne i da mu planira sve preventivne nekakve radnje koje treba da uradi. Ja nemam utisak da je to postignuto. Do sada sam upozoravao i govorio o ovome svemu na ovakav isti način. Nije se dovoljno pomaklo. Evo sada se iznose još nekakvi detalji, a po meni su to sitni nekakvi detalji, ali ovo je suština rada Doma zdravlja. Dom zdravlja nije zadužen da ima internistu, ni kardiologa, a zna se koliko treba da bude pedijatra. Mi na ovaj način kompenziramo ovaj nedostatak. Kada budu doktori porodične medicine u svim timovima, manji dio te specijalističko konsultativne službe će biti potreban. Taj dio treba neko drugi da odraduje. Smanjit ćemo šetanje naših ljudi po drugim ustanovama i potrebe da ide na nekim drugim mjestima da završava. U izvještaju ste vidjeli da je nabavljen ultra zvuk koji je fantastičan i kada vidim da je urađeno 700 ultra zvukova. U normalnim uslovima, po mom razmišljanju, svaki doktor treba da bude educiran da to može uraditi. Na ovom aparatu treba da bude godišnje urađeno 10.000 ultra zvukova. Znači nije to nikakva ekskluziva da treba neko specijalan i to se može uraditi pet puta u toku dana. To je procedura koja traje pet minuta i on ko zna on to može za pet minuta uraditi ono što treba. To su stvari koje mi treba da pomaknemo ako hoćemo da imamo bolju i kvalitetniju zdravstvenu zaštitu. Sada sam vam rekao mi za tri godine nećemo imati ni jednog specijaliste porodične medicine, jer ne vjerujem da mi možemo gotovog specijalistu ovdje primiti, jer ih i nema dovoljno na Kantonu, ni izvan kantona. Da li su to sada ekonomski razlozi pa da se ne šalju, ali da se ne raspisuje konkurs najmanje 10 godina ... Nije to samo problem ovog direktora i prije njega su to isto radili. Ovo je problem koji se vuče i ovo je već kulminiralo i sada da raspišemo dvije specijalizacije ne znam da li će se poklopiti sa odlaskom ovih kolega u penziju. Hajmo pokušati mijenjati i dati drugačije smjerove menadžmentu da se mora raditi u tom pravcu. Pravilnik se mora uskladiti sa standardima i normativima koji su suprostavljani, a da li će se uskladiti za pet godine, mi njega moramo uskladiti. Upravni odbor je prošle godine usvojio taj pravilnik koji ja lično ne bih mogao potpisati. To su stvari koje treba početi mijenjati u pravnoj toj regulativi usmjeriti i dati nekakav drugačiji pravac i trebamo poboljšavati u ovom smislu. U medicini postoji jasna hijerarhija zna se gdje je doktor, a zna se gdje je medicinar. Ako se to poremeti mi imamo remećenje svega. Zna se ko kome naređuje i ko je odgovoran zašto. Ne smijemo nikoga protežirati, a ne smijemo nikoga ni sankcionisati bespotrebno. Svi u Domu zdravlja i svi koji negdje radimo, radimo zbog nekakve plate, ali trebamo tu platu zaraditi i biti profesionalci. Ja vjerujem i ubijeden sam i do sada se pokazalo u toku rata, pa i poslije rata da je dobar dio tog kadra pokazao svoju profesionalnost i to uopšte nije sporno. Mislim da ove stvari samo trebamo drugačije raditi i da menadžment ide u tom pravcu da se poboljša struktura stručnosti i da se stručnosti daje prioritet.“

Emira Karić, predsjednica kluba vijećnika SDP: „ Ja sam zaista pomno slušala jako lijepo izlaganje, ali moram ići u jednom drugom pravcu. Sve ovo što ste govorili naravno ne može ići na adresu neke optužbe JZU Dom zdravlja i ja ću vam navesti pravu adresu ovog svega što ste vi govorili, a to je korumpirana vlast nacionalnih stranaka u Bosni i Hercegovini. Dovelu je do nesigurnosti opstanka u našoj državi i samim time specijalizanti kalkulišu šta i kako dalje. Zahvaljujući nepovjerenju u zdravstveni sistem građani su najviše doprinijeli da ova pandemija u Bosni i Hercegovini se dovede u dobar okvir, a ovakav kuršlus zdravstvenog sistema ja usmjeravam ka adresi korumpirane vlasti nacionalnih stranaka.“

Dr. Ferid Konjić, predsjedavajući Općinskog vijeća: „ Svako ima svoje mišljenje. Mi u državi smo svjedoci izmjena vlasti na svim nivoima i nemam utisak da se neko drugačije ponašao. Ja se nikada ne ponašam kao klasični političar i ovo ne bih govorio da sam ja klasični političar. I sada imamo na raznim nivoima vlasti podatak kada govorimo o domovima zdravlja u našem Domu zdravlja od 7 timova imamo 2 da su specijalisti porodične medicine, u Gračanici gdje je SDP na vlasti od 27 ima 7 doktora porodične medicine. Ako govorimo o ovom segmentu mene niko neće ubijediti da se kod nas u državi neko posebno ponaša kada je na poziciji. Ja govorim šta mi možemo uraditi u ovom trenutku i na ovom mjestu i mi smo za ovo odgovorni. Na nivou Kantona mi malo možemo uticati, a na nivou Federacije i Države možemo samo aplaudirati ili kritikovati. Ovdje mi možemo raditi nešto, možemo uraditi ako hoćemo uraditi i ako shvatamo isto.“

Emira Karić, predsjednica kluba vijećnika SDP: „ Ja vas razumijem možemo mi uraditi na ovom nivou, ali ne možemo promijeniti svijest građana koji žive u ovoj državi. Zato su viši nivoi zaslužni, pogotovo državni nivo neće promijeniti ničiju svijest ni u lokalnoj zajednici što znači samim time da je jako bitno kako funkcionišemo i na državnom i na kantonalnom, a naravno i na lokalnoj zajednici.“

Dr. Ferid Konjić, predsjedavajući Općinskog vijeća: „ Bespotrebne su dugotrajne diskusije kada je čovjek u pravu. Ima li još diskutanata? Ne vidim prijavljenih. Direktore, bilo je pitanja, izvoli.“

Dr. Nermin Suljkanović, direktor JZU Dom zdravlja Doboj Istok: „ Esalamu alejkum načelnice, esalamu alejkum predsjedavajući, esalamu alejkum i pozdrav svima vama vijećnicima, gostima, medijima. Ja sam sebi zabilježio i pokušat ću odgovoriti onoliko koliko budem mogao da odgovorim. Prije nego što odgovorim morat ću da kažem što se tiče ovog izvještaja, ovaj izvještaj je prvo moj izvještaj, pa tek onda izvještaj Upravnog odbora. Znači ako nije dobar Upravni odbor, nisam dobar ni ja, a ja sam moralna i ponosna osoba i tako ću i postupiti. Emira je postavila pitanje vezano za nedovoljno transparentan konkurs i nedovoljno transparentan izvještaj. Što se tiče izvještaja mi uvijek nastojimo maksimalno sve informacije da dostavimo. Ja znam vi zamjerite ovdje finansijski dio i samo jednom neka dođe napismeno od Vijeća da vam mi dostavljamo finansijski dio mi ćemo vam dostaviti. Ja sam prije četiri godine govorio da dođe napismeno od Vijeća. Zašto? Drugačije je obdanište, obdanište se finansira od strane općine najvećim dijelom i dužno je da vam to predoči. Naš finansijer, sami ste rekli 2 miliona i nešto, je Zavod tako da mi sve finansijske izvještaje podnosimo njima. Izvještaji su transparentni i dostupni i možete u svakom slučaju kao građanin i kao vijećnik doći i tamo ga pogledati bez ikakvih problema. Mi ne možemo svoje finansijske izvještaje objavljivati po stanicama, ali vama ako zatražite slobodno možemo da damo. Što se tiče konkursa ne sviđaju se ni meni uvijek ishodi konkursa, a vjerujte mi što se tiče mene ja sam samo nadležan da imenujem komisiju. Imenovao sam komisiju u sastavu ljekara najboljih koje sam tada imao, a to su Zijad, Armin i Jasmin. Tada nisam imao doktora Vodeničarevića, za sve do sada provedene konkurse. Znači gledao sam najiskusnije ljekare koji odrade 100 % po pravilniku. Ja nisam kriv što je neko nakaradan pravilnik napravio i nije dao nikakvu mogućnost ni šehidskim porodicama. Oni imaju samo prednost po tom pravilniku ako dva ista kandidata imaju isti broj bodova. U tom slučaju se mora primiti demobilisani borac, porodica šehida i ratnih vojnih invalida, a da su možda mogli i drugačije odraditi to je na njihovoj savjesti. Znači oni su potpisnici i komisije i prijedloga rang liste, a ja njih svaki puta upozorim da su zakonski odgovorni i da stoje iza toga. Što se tiče toga i ja bih volio da prvo zaposlimo šehidsko dijete, pa dalje dijete ratnog vojnog invalida i demobilisanog borca. Emira je takođe spomenula neko ispitivanje, nismo mi radili nikakvo ispitivanje to je samo jedna analiza higijensko epidemiološke službe na osnovu izvještajnih podataka gdje je kroz našu službu plućno prošlo i znajući naše klimatološke uslove da smo u području gdje je izrazita koncentracija i magle i smoga i da oni kažu da ima uticaja na veći broj naših respiratornih infekcija. Kemo – bodovanje, mislim da sam već odgovorio. Nabavka saniteta mogla se nabaviti iz humanitarnih, vjerujte Kemo ja sam se federalnim i kantonalnim ministarstvima obraćao i tražio mogućnost privrednika, jer sam vidio da je moj kolega iz Čelića preko svojih privrednika, pa i dijaspore uspio nekako. Pričao sam i pokušavao nešto, međutim mi smo mala općina i nemoguće je veće sume izdvojiti za takve stvari. Gračanica npr. privrednici su skupili i uzeli sanitet koji košta 180.000 KM. Koliko sam već vremena ovdje ja nisam naišao na tu neku podršku da idem u tom smjeru osim onoga što smo preko Duja nabavili. Meni je žao, kao što ti kažeš, to jesu stvarno pare i korisnika i uposlenika, koje nisu uštedene za godinu, nego za nekih 7 – 8 godina. Mislim da idu u pravom smjeru, jer ih opet vraća našim korisnicima, jer će biti transportovani da budu stabilni i ispravni i da bude brz prevoz i prevoz koji će moći doći na svako područje naše općine zato što se radi o vozilu 4 x 4. U vezi toga konsultovali smo i hitnu i njihove ljekare i oni su se konsultovali sa kolegama iz drugih domova zdravlja i većina domova zdravlja ide u tom smjeru zbog stabilnosti. Ti sada novi saniteti bez obzira što su 4 x 4 nisu veliki potrošači, jer je tamo u onom prospektu pisalo da troši negdje oko 9 litara, dok mercedes troši negdje 15 – 16 litara, tako piše, a ko zna koliko troši. U našem sanitetu jako je stara oprema, a znaš i sam vozač si, u svakom trenutku mene je strah da neće stati obadva i da nećemo imati ni jednog. Kako transportovati te ljude i ja ću se ovom prilikom zahvaliti Dujama što su usmeno obećali da njihov sanitet stoji na raspolaganju i ako se šta desi to nam je neka olakšica u ovome svemu. Što se tiče nabavke saniteta to je išlo 100% po zakonu. To je prvi naš veliki javni konkurs preko 50.000 i Upravni odbor je donio odluku na osnovu predviđenog plana javnih nabavki. Proces je završen i čekamo njegovu isporuku. Njegova isporuka je predviđena za nekih 110 dana, a malo je i ova korona uticala da ne dođe ranije. Imam obavijest od njih da će ispoštovati, jer su nam poslali pismeno da će ispoštovati tu proceduru koliko su rekli za vremenski rok isporuke. Što se tiče prostorija hitne ja znam da je tu bilo puno kolebanja, međutim to smo odradili i neke odluke nekima ne odgovaraju, drugima odgovaraju. Znači spustili smo fizijatriju zbog insistiranja komisija koje su dolazile u kontrolu iz Tuzle. Kada budemo u Domu zdravlja vidio si i ti milion puta da jednostavno nosimo ljude uz one stepenice koje nisu ni blage, niti ih ima malo, kada radimo gore na spratu. Zbog toga smo, jer nismo

imali drugih prostorija. Ti znaš i sam sam ti milion puta rekao do 3 sata je fizijatrija i ona prostorija je dalje od hitne i može se koristiti za hitnu uvijek. Vama ako treba za infuziju ona je uvijek dostupna. Što se tiče pitanja Mehmeda jest velika je suma, jer je povećan naš budžet. Međutim sve je to na osnovu zadnja 2 – 3 kolektivna ugovora, jer je povećanjem standarda u državi povećana su prava radnika. Što se tiče primjedbi doktora Konjića ja se ne slažem, jer ja radim u primarnoj zaštiti duže vremena. Primjedbe jesu ispravne, ali što se tiče adrese ili Općinskog vijeća ili Doma zdravlja nisu adrese. Zato što se većina ovih stvari koje je naš doktor uvidio i što jesu problem je problem viših nivoa na koji mi ne možemo uticati jednostavno zbog te komunikacije i zbog svega. Mi u prošlom mandatu nismo imali dva sastanka sa ministrom i kako smo mogli uspostaviti komunikaciju i sa kliničkim centrom i sa bolnicama kada jednostavno nije bilo ni sastanaka. Ovo dalje ne bih ništa posebno vam odgovarao. Što se tiče pravilnika on je već 15 – tak godina suštinski i nešto nije posebno mijenjan. Zna se ko uspostavlja pravilnik, to radi Upravni odbor na prijedlog sindikata i zna se tačno ko utiče na Upravni odbor. Ja samo postupam po pravilniku. Zadnji Upravni odbor je najmanje odgovoran, on je samo promijenio zadnje koeficijente radnicima, a ostalo ništa nije mijenjan. Sve ove što kažete po vama moralne nepravilnosti, ne zakonske, su donesene prije puno godina. Što se tiče ultra zvuka to vam moram jedino reći da ima ginekologija i da se ultra zvuk ne koristi samo za radiologiju.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavaње. Ko je za ovaj Izvještaj?“

Glasanje: ZA – 3, PROTIV – 5, UZDRŽANIH – 9.

Ad.6. Razmatranje i usvajanje Izvještaja o radu JU Centar za socijalni rad Doboj Istok za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Selamim gospodina direktora. Što se tiče glasanja moj stav će ostati isti i ja ga nikada neću ni promijeniti, ali ga neću ovdje ni ponavljati. Malo ću proći kroz izvještaj. Pohvalit ću ovu akciju Jedan obrok dnevno na području naše općine, jer to je zaista u ovom mraku baš jedno svjetlo. Nebitno je u koje mjesne zajednice to ide, ali je jako dobra stvar i za sadašnjost, a pogotovo za budućnost i nadam se da će se taj projekat održati i u daljnjem periodu. Navela sam sebi još rad Upravnog odbora – mala sugestija ne morate vi nama direktore, navoditi definiciju upravnog odbora i nadležnosti upravnog odbora što ste ovdje naveli. Jednostavno govorimo o radu Upravnog odbora i da kažete koliko je održano sjednica, otprilike malo transparentniji rad. Ko je bio na sjednicama, ko nije i otprilike šta se raspravljalo, a vi ste nama naveli definiciju i šta je Upravni odbor Centra za socijalni rad. Opet ću se vratiti, sada je već neugodno slušati, na logopeda. Moje iskrene preporuke, moram vama jer on radi pri Centru za socijalni rad, koliko sam ja razumjela. Prvo trebala je ići on-lajn ta neka komunikacija sa dosadašnjim korisnicima usluga. To se moglo odraditi bar na nižim nivoima i ako ništa da je obuhvatio razrednu nastavu sa kojom od djece u Klokotnici je do sada djelovao. Mogao je video pozivima ili već kako se dogovore, ukoliko se dogovore sa roditeljima, nastaviti taj oblik rada. Ako mu nije kasno, a možda jeste, pošto nastava traje još sjedmicu ili dvije, pa kažem trebali ste se i vi na vrijeme uključiti kada je njegov rad u pitanju. Takođe ukoliko je moguće da se logoped na općini Doboj Istok, jer je zaista dao dobre rezultate, primi na cijelu normu, da tako i njemu olakšamo. Zaista čestitke za osobu koja je primljena, po meni je stručna i nikakve primjedbe nemam na njegov rad, da samo odradi cijelo radno vrijeme, a da time i poveća broj djece, a da i njemu pružimo komotnije radno vrijeme, a time i boljitak u samom radu.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih. Direktore, bujrum.“

Omer Konjić, direktor JU Centar za socijalni rad Doboj Istok: „Da vas sve poselamim i pozdravim. Što se tiče rada Upravnog odbora, Upravni odbor zasijeda mjesečno jednom, tj. svaki mjesec imamo jedan sastanak, a po potrebi i više sastanaka. Ne smatram da treba to u izvještaju, ali evo idući put će to biti. Što se tiče logopeda, logoped je u saradnji sa osnivačem, tj. općinskim načelnikom pošto je načelnik imao više zahtjeva od roditelja djece iz škola Klokotnica, a Brijesnica manje. Prema načelniku je bilo zahtjeva da se primi logoped u Centar za socijalni rad. Ja sam morao uraditi sistematizaciju i ponovo mijenjati pravilnik

da primimo logopeda i primili smo ga na pola radnog vremena i primili smo ga na 6 mjeseci. Kada je ova korona počela tada je i ugovor nekako istekao i ja nisam ni produžavao ugovor. Sada u ovoj 2020. godini nam je povećana tranša za logopeda za čitavu normu. Tako da kada krene školska godina, ja se nadam da ćemo ga primiti na čitavu normu da može raditi. Jest bilo malo teško na pola radnog vremena, jer je momak išao i u Osnovnu školu „Klokotnica“, Osnovnu školu „Brijesnica“ i u obdanište. Njemu je bilo naporno i on je ostajao i duže raditi u obdaništu, jer je rana intervencija ključ uspjeha. Tako da se nadamo da će od iduće školske godine, kada se ovo stanje sa COVID-om smiri da ćemo ga primiti na puno radno vrijeme, pa da radi u Centru i da roditelji dovode djecu u Centar, jer u starim prostorijama Centra ima jedna prostorija koju bi možda opremili, a ima i jedna prostoriju koju smo opremili uz pomoć Općinskog načelnika i World vision preko projekta za rad sa djecom sa problematičnim ponašanjem.“

Emira Karić, predsjednica kluba vijećnika SDP: „Izvanredna vijest što se tiče cijele norme. Međutim moram se osvrnuti na to što ste rekli da se osposobi prostorija da to nije dobar prijedlog. Dolaskom u samu školu puno je više obuhvaćeno djece. Vjerujte mi, mi smo preporučivali roditeljima da idu u Gračanicu i možda je bilo 3 % da su se odazvali. Bojim se da će se stopirati, ali o tom potom vidjet ćete. Uvijek se nađe neki razlog, žalosno je to i ja ne krivim roditelje, ali smatram da dolaskom u školu na neki način obavezujemo to dijete, a u vrlo kratkom periodu dođe do pomaka, pa i ne pružanja usluga određenom djetetu. Da li to predstavlja njemu problem u finansijama vezano za prevoz, ne znam, ali bilo bi dobro da se to može i to ostvariti i da ipak on dolazi. U Centar za socijalni rad je u redu pogotovo za mlađu djecu koja ne idu u obdanište. To ste mislili, ja se onda izvinjavam. To je za djecu koja ne idu u obdanište a primijeti se određena ... onda se izvinjavam zaista, krivo sam razumjela.“

Omer Konjić, direktor JU Centar za socijalni rad Doboj Istok: „Što se tiče dolaska u Centar od tih roditelja djece koja nisu ni u obdaništu, a nisu ni u školi je i krenula inicijativa, a išli su u Gračanicu kod logopeda. Za tu sam djecu mislio da dolaze u Centar gdje imamo adekvatno opremljen prostor za rad sa djecom. Što se tiče prevoza svako dijete ima preko Centra, preko ove organizacije što saradujemo sa njima i oni plaćaju jedan dio prevoza, a ima i ministarstvo koje plaća prevoz djeci.“

Kemal Bratić, općinski načelnik: „Sve vas srdačno selamim i nadam se da ste u rahatluku i zdravlju ispostili ramazan, bajram odbajramovali i ako Bog da želim vam svima da još dugo u zdravlju i rahatluku dočekate. Smatram da je ovo veoma ozbiljna tema i malo ću se našaliti, nadam se da se vijećnica Emira neće naljutiti, dobio sam možda pohvalu od nje za taj nekakav potez. Nije to problem koji traje dan ili dva, mjesec ili dva mjeseca, to je problem koji se vuče dugi niz godina. Pomenut ću nečiju diskusiju ovdje i opet je to na neki način nerazumijevanje ili ne imanje sluha za nekakve probleme u lokalnoj zajednici, pa i osnovnim, odnosno srednjim školama i obdaništima. Na inicijativu grupe roditelja djece sa posebnim potrebama održao sam nekoliko sastanaka, a dužan sam pomenuti Udruženje građana djece sa posebnim potrebama. Oni su čak napravili jednu posjetu kod mene i doveli su djecu. Onda sam ja ušao u srž problema, kontaktirao sam ministarstvo i dužan sam reći da smo u tom periodu angažovali, ako ne griješim, defektologa na jednu čitavu normu u tom periodu. Dobili smo defektologa preko srednje škole i mi smo na neki način završili pola norme logopeda. Morali smo naći način i ja sam čak bio spreman da mi ministarstvu uplatimo sredstva da oni angažuju logopeda, međutim nisu mogli da nađu nikakvo rješenje. Direktor je rekao da smo planirali u budžetu i vjerovatno ćemo tako napraviti da taj logoped bude toliko značajan. Naravno ne treba sada to sve, dosta profesori razredne nastave mogu one manje probleme da rješavaju koji nisu za logopeda, da ne šaljemo logopeda ako dijete nije za logopeda. Ono što želim da kažem jeste direktore, vi trebate u što kraćem roku raspisati konkurs i definisati da je radni status započinje početkom godine. Tako da to riješimo i da vas ne sprječava da raspisujete konkurs i nabaviti onaj hodogram posjeta kako svim školama, tako i obdaništu. Naravno ima i onih koji će djecu dovoditi tamo u sobu koja je na neki način i predviđena za te stvari, jer djeca su opuštena u takvim prostorijama. Ono što želim da kažem je da u narednom periodu, bar mene što se tiče, a smatram i svih vas ovdje, neće biti upitno povećanje sredstava za neku instituciju, a da li će to biti Dom zdravlja, da li Centar, da li obdanište i da pružimo na neki način bar minimalnu pomoć roditeljima koji imaju djecu sa posebnim potrebama. To je nešto najmanje što možemo uraditi i smatram da to ne treba da bude problem. Finansijska sredstva ne bi trebala da budu problem, a nisam znao dubinu tih problema koji imaju i oni su mene tom prilikom upoznali sa svim tim problemima na koje oni nailaze. Ukoliko bude potrebe mi ćemo u nekom narednom periodu raditi rebalans i ukoliko bude potrebe da još nekome pomognemo samo

moramo naći način kako i da primimo ova stručna lica koja će pomagati kako roditeljima, a tako i predavačima u svim našim obrazovnim ustanovama na području općine Dobož Istok.“

Dr. Ferid Konjić, predsjedavajući Općinskog vijeća: „ Ne vidim više prijavljenih diskutanata i dajem na izjašnjavaње. Ko je za ovaj Izvještaj?“

Glasanje: ZA – 11, PROTIV – 0, UZDRŽANIH – 6.

Ad.7. Razmatranje i usvajanje Izvještaja o radu Općinske izborne komisije Dobož Istok za 2019. godinu.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Pokušat ću biti kratka i jasna i krenut ću od toga da kao i prošlogodišnji izvještaj o radu OIK-a, inače kalkulišem da li ću biti za ili suzdržana, i prošli i ovaj ću biti protiv. Naravno da ću objasniti razloge. Ne mogu se oteti dojmu onako katastrofalno organizovanih parlamentarnih izbora. Ja mislim da će se te stvari ponavljati iako će nešto biti lakše, vi ste se ovdje dokućili Programa rada Izborne komisije za 2020. godinu, koja je izborna godina. Bit će nešto lakše, ali ne želim oprostiti onakve predsjednike biračkih odbora, a imalo se vremena, imalo se načina, imalo se mogućnosti, onako mrcvarenje građana, onako mrcvarenje posmatrača i svih ostalih koji su bili u toj prostoriji, onako sramotno nepoznavanje pravilnika i zakona itd. koje je krucijalna stvar u odbrani nekih primjedbi i argumenata. Ovo nije nikakvo upozorenje, ali samo da znate posmatrači od strane SDP, a vjerovatno još nekih političkih subjekata, bit će toliko dobro educirani da će jednostavno imati primjedbi i znat će svoja prava, a sve iz razloga da neće dozvoliti da niti jedan krivi glas ode u nekom smjeru. To vam ovdje potpisujem, samo zato što će znati svoja prava i znat će se pozvati na prava. Budu li posmatrači ugnjetavani u bilo kojem obliku i na ovo sam spremna bit će za minutu obaviješteni određeni portali koji će to na svojim stranicama obavještavati. Ja nikoga ovdje ne želim plašiti, nego sam jednostavno došla do određene metode, do određenog mehanizma, gdje mogu određene stvari staviti na svoje mjesto. Zašto govorim? SDP neće dobiti veći broj ni predsjednika ni biračkih odbora, ali imamo pravo na posmatrača koji će itekako znati svoja prava. Takođe će upozoravati ostale koji ne budu znali svoja prava, jer sam i sama bila posmatrač, pa sam druge posmatračice obavještavala da ne mogu komunicirati sa članovima biračkih odbora, ne može posmatrač naređivati članu biračkog odbora, a da ne govorim za ono postavljanje glasačkih listića u koju kesu itd. Sramota i dalje sam protiv ovog izvještaja.“

Dr. Ferid Konjić, predsjedavajući Općinskog vijeća: „ Ima li još diskutanata? Ne vidim prijavljenih. Predsjedniče Komisije, izadite za govornicu.“

Šemsudin Bećirović, predsjednik Općinske izborne komisije Dobož Istok: „ Poštovanje predsjedavajući, poštovanje vijećnici ja mislim da je današnja tema Izvještaj o radu Općinske izborne komisije za 2019. godinu, a ovdje se diskutuje o izvještaju o radu za 2018. godinu, a o tome smo diskutovali ovdje prošle godine. Treba da razmatrate ako ima primjedbi na Izvještaj o radu za prošlu godinu i to je to.“

Emira Karić, predsjednica kluba vijećnika SDP: „Ovdje ste dali Program rada Općinske izborne komisije za 2020. godinu, što znači izbornu godinu i ova moja diskusija vraćanja, retrospektive događaja odnosi se na što bolje ostvarenje ovog vašeg programa rada na što ja imam pravo sumnjati, a ima pravo i upozoriti. Isto tako ja se isključivo držim izvještaja, jer ste ovdje dali izvještaj za 2020. godinu u kojem Bog zna šta i ne radite, pa se u 2019. godini možete lijepo pripremiti za izbornu godinu 2020. U tom smjeru su išle moje diskusije.“

Kemal Skopljak, vijećnik BPS: „ Ja imam jedno pitanje. Do kada je mandat predsjedniku Izborne komisije općine Dobož Istok? Je li to vječni mandat ili ima rok?“

Dr. Ferid Konjić, predsjedavajući Općinskog vijeća: „ Svaki mandat ima svoj rok. Niko nije postavljen na mandat, a da nema roka. To mi svi znamo i može se naći do kada je mandat kome. Ima li još diskutanata? Ne vidim prijavljenih. Ko je za ovaj izvještaj?“

Glasanje: ZA – 12, PROTIV – 4, UZDRŽANIH – 1.

Ad.8. Razmatranje i usvajanje Izvještaja o radu JKP „ČISTO“ d.o.o. Doboj Istok za 2019. godinu.

Dr. Ferid Konjić, predsjedavajući Općinskog vijeća: „ Dobili smo ovlaštenje od direktora da ga zastupa Sofić Rasim. Materijal ste dobili, tačku dajem na diskusiju.“

Emira Karić, predsjednica kluba vijećnika SDP: „Kao i ostale, tako i ovaj izvještaj, uvijek pomno pročitam, međutim odluku o glasanju za, protiv ili suzdržan po ovom izvještaju ipak će presuditi neke druge stvari sa kojim ja u prošlosti nisam bila upoznata, što me naravno ne čini ni krivom ni pravom. Krenut ću redom. Vezano za statut koji ste u skorom periodu nešto i mijenjali zaista je sramotno da toliko dugo u jednom statutu ne može se navesti koliko traje mandat v.d. direktora i ko može biti v.d. direktor. Ako neko ne zna kako da postupi onda uzme neke akte i neke zakone sličnih ustanova itd. Vidim da ste taj dio u statutu promijenili što pozdravljam i možda da sugerišem, malo je tri mjeseca v.d. mislim da ste trebali ići na opciju od 6 mjeseci, jer brzo prođe tri mjeseca, obzirom da imaju procedure. Možda je to kod vas lakše, mi imamo Pedagoški zavod, pa Ministarstvo, pa se to oduži i moramo biti pripremljeni prije isteka na dva mjeseca da se uđe u neku konkursnu proceduru. Ovdje je vjerovatno lakše. Ja sam takođe htjela na ovoj sjednici da idem sa inicijativom da se obori Nadzorni odbor, uopšte neću više skrivati, za nestručan rad, za zanemirivanje određenih građana, klijenata ili bilo koga ko se obrati tom Nadzornom odboru. Nadzorni odbor je primio nekoliko žalbi i smatram da ako se primi žalba da se mora dati odgovor na žalbu. Ako Nadzorni odbor ne odgovori, vjerovatno bi mi na Općinskom vijeću, ali mi nismo stavili ni informativno žalbu bivšeg direktora Asima. Znači to je jedno veliko zanemarivanje, a tako se jedan Nadzorni odbor ne smije ponašati i smatram da ga treba smijeniti. Imat ćemo smjenu nekih odbora koji se za moj pojam i ne trebaju smijeniti. Politika sve kaže, sve je obojeno, bar kod nas na općini Doboj Istok, politički, odnosno SDA stranka što donese tako i bude, a vidimo da idete non stop u krivom smjeru. Mi pokušavamo ovdje ispraviti taj krivi smjer, pokušavamo dati dobre smjernice da budemo koliko toliko uzorna općina, ali nema od toga ništa.“

Fajik Muratović, vijećnik SDP: „Pošto se prvi puta javljam, sve vas selamim i pozdravljam. Ja sam izašao da zamolim ovog tehničkog rukovodioca JKP „Čisto“ da nam pojasni ove šematske prikaze vezano za ove rezervoare. Da li postoje na svakom rezervoaru predpumpne stanice i ako postoji, postoji li mogućnost da se jednom pumpom izbacuje na gornji rezervoar, pa da se slobodnim padom vraća na ostale. Tu se radi o ogromnim uštedama.“

Dr. Ferid Konjić, predsjedavajući Općinskog vijeća: „ Ima li još diskutacija? Nema. Tehnički direktore, izvolite.“

Rasim Sofić, tehnički direktor JKP „Čisto“ d.o.o. Doboj Istok: „ Gospodine predsjedavajući, načelnice, cijenjeni vijećnici, ostali gosti ja vas sve selamim i pozdravljam. Ja sam došao danas ovdje da pojasnim neke stvari iz izvještaja koje vam budu nejasne. Očekivao sam više pitanja, a mi smo se trudili da izvještaj napravimo što preciznije i da se može vidjeti sve. Ko pročita detaljno izvještaj onda ima sve odgovore. Ja sam očekivao pitanja o dobiti, ali ima odgovor unutar toga zašto je dobit i kako je raspoređena. Što se tiče izmjene statuta vezano za v.d. direktora ja pišem tehnički dio, direktor treba da piše svoj dio, a ekonomista piše svoj dio. Ja vjerujem nisam obratio pažnju na taj dio kada sam pisao tehnički dio izvještaja, jer mene više interesuje tehnika, rezervoari, pumpa, troškovi, materijal i tako te stvari. Mi smo u međuvremenu između ove dvije sjednice imali dva izvještaja, izvršili usklađivanje našega statuta sa izmjenama Zakona o privrednim društvima, jer to je bio uslov. Iako su te izmjene Zakona o privrednim društvima više bile vezane za sazivanje skupština i tom prilikom smo se potrudili da riješimo pitanje koje je bilo problem u starom statutu vezano za v.d. direktora. Naš prošli statut prije ovoga je rađen po modelu koji je objavljen zajedno sa Zakonom o javnim preduzećima, a ni prema Zakonu o privrednim društvima, znači ni jedan taj zakon nije tretirao v.d. direktora. Prilikom imenovanja o razrješenja bivših v.d. gdje sam i ja 20 dana obnašao funkciju v.d. direktora, imali smo neke epizode. Ja sam isčitao stranice i stranice zakona i zakona, Zakon o ministarskim i vladinim imenovanjima, zakon o nekim drugim imenovanjima, jednostavno to nigdje nije precizno rečeno, ni o roku, ni o načinu. Na kraju krajeva pošto se dvotrećinskom većinom svih udjela mora donijeti statut i u statut je ugrađeno, a mislili smo da je tri mjeseca dovoljno i uradili smo da se v.d. direktora može imenovati na tri mjeseca. Ja i dalje stojim da se procedura imenovanja novog direktora u javnom preduzeću može provesti u roku od tri mjeseca. Krene

se ranije i neko treba da pazi kada direktoru ističe mandat i da na mjesec dva prije toga upozori Nadzorni odbor da krene sa procedurom. Taj isti direktor može biti v.d. tri mjeseca, a ako on ne dao Bog umre ili strada ili napusti, onda se neko može imenovati. Mi smo tražili da to bude ispred radnika i nije to ugrađeno, ostalo je da ostane na volju ko imenuje i Nadzornom odboru ostaje da imenuje v.d. Zadnji Nadzorni odbor, mi smo skoro na zadnjoj skupštini, pred ovaj izvještaj imenovali faktički novi – stari Nadzorni odbor. Općina kao osnivač je provela proceduru i neću da ulazim da li je to na osnovu naloga Vijeća, uglavnom provedena je konkursna procedura i javila su se dva čovjeka i ta dva čovjeka su predložena skupštini, a skupština je usvojila. Mi nismo mijenjali svog člana Nadzornog odbora tako da je faktički Nadzorni odbor ostao u starom sastavu. Koliko je ko zadovoljan njihovim radom o tom potom, ali Vijeće vjerovatno ima mogućnost da predloži da li nadzorni odbor treba smijeniti ili kazniti na osnovu nekih pokazatelja. Što se tiče šematskog prikaza ovo je direktor ubacio, jer je smatrao da treba da upozna ovaj saziv Vijeća sa šemom našega sistema. Ovo se odnosi uglavnom na sistem Klokočnica zbog toga što sam vam u prošlom izvještaju, ako se sjećate, pisao da negdje postoje kritične tačke u ovom sistemu. Ovaj sistem se širi malo više i on više nije mjesni vodovod nego vodovod malo širi. Ovo što kaže Fajko, na glavnoj liniji u Klokočnici postoji na bunaru predpumpna stanica, na prvom rezervoaru predpumpna stanica, na sljedećem u Frkatima predpumpna stanica i diže se do Duja voda sa te predpumpne stanice. Pored toga postoji predpumpna stanica Ahimbašići koja preuzima vodu iz Frkata i diže u Ahimbašiće u rezervoar i predpumpna stanica u Habibovićima na Orahu koja vodu diže do Brđana i ovim gore višim zonama. Bila je jedna ideja davne '98. godine, tada je sarađivala sa općinom, zaboravio sam kako se zove ta humanitarna organizacija i čovjek je bio predložio jedan projekat da se na Dujima napravi rezervoar od 1500 m³, pa bi se iz rezervoara u Klokočnici dizala voda gore, a onda bi odozgo pravili mreže povratne u rezervoare i da ide nizbrdo. Međutim kada sam ja to jednom prezentirao stručnjacima iz vodoprivrede i ministarstva oni su rekli da je to ekonomski neisplativo i da je to glupost i svi su podržali ovaj sistem prepumpavanja iz jedne u drugu zonu. To je ta šema, svaki ima predpumpnu stanicu i nije se mogla izbjeći ni jedna, jer je takva konfiguracija. Ja bih više volio da ima manje pumpi, jer je i sada pumpa jedna stradala i valja belajati sa time, pa uvijek moramo imati jednu rezerve. Pošto na sljedećoj sjednici ima izvještaj o higijeskoj ispravnosti vode za piće i stanju objekata u tom ćemo izvještaju ponovo pomenuti koje su to kritične tačke. Mi sada trenutno imamo kritičnu tačku rezervoar u Frkatima i najvjerovatnije je da će potisni vod između ova dva rezervoara, jer je taj rezervoar od 100 m³ mali i radit će se na tome, naravno donacija itd. i mislim da ćemo to riješiti u dogledno vrijeme kada se stvore prilike.“

Kemal Bratić, općinski načelnik: „ Slažem se ja sa uvaženom vijećnicom da one koji ne rade kako treba, treba smijeniti. Ja ću uzeti na sebe da ispitam da li je nadzorni odbor nešto radio mimo zakona ili protiv interesa lokalne zajednice ili komunalnog preduzeća. Ono što znam jeste da je u prethodnom periodu dugotrajan proces bio da se izmjeni statut. Statut koji je trebao da pripremi notar, statut koji niz godina nije mijenjan i statut koji nije bio u skladu sa zakonom. Statut bi možda drugačije izgledao da ga ne donosi nadpolovična većina, međutim morali smo naći kompromis, čini mi se da su dvije ili tri skupštine sazivane da se nađe kompromis i nekakvo rješenje da bi se taj isti statut uradio. Da li on može biti bolji? Ja vjerujem da može. Ono o čemu mi trebamo razgovarati je izvještaj o radu, a ne imenovanjima. Da li je to kako treba ili nije, to neko ispituje ili će ispitati. Znači to će se vjerovatno ispitati. Sljedeća instanca nije Vijeće, uvažena vijećnice. Zna se ko je sljedeća instanca. Ukoliko nadzorni odbor nije usvojio žalbu nečiju ili razmotrio zna se šta je sljedeći korak. To je nebitno, ali ono što je bitno i o čemu mi trebamo voditi računa jeste za razliku od nekih susjednih općina da je kod nas do svakog domaćinstva dovedena voda. Svako domaćinstvo ima vodu. Imamo u komšiluku ogromne probleme, pa su me ljudi zvali, dolazila je i delegacija iz susjedne općine da pokušamo zajednički riješiti taj problem. Ja sam voljan, a vjerujem da ste i vi voljni, ali ne na uštrb građana općine Doboj Istok. To je ono čemu mi trebamo težiti i o čemu mi trebamo najviše raspravljati, da li je kvalitetna usluga komunalnog preduzeća itd. Ako se vratim 4 – 5 godina unazad, nismo imali u svojoj mjesnoj zajednici vodu, a da ne govorim o dijelu mjesne zajednice koja pripada Republici Srpskoj, a do nedavno nije imala ni Lukavica Rijeka. Dakle, vidi se određen napredak kada se radi o uslugama koje daje naše komunalno preduzeće. Ja moram priznati, evo tu je tehnički direktor, može i bolje, ali s obzirom na kapacitete kojima oni raspolažu i na neke prethodne stvari koje su se dešavale trebamo biti zadovoljni. Tako da nam prvenstveno, ponavljam, treba biti cilj da se smeće redovno odvozi, da imamo kvalitetnu pitku vodu i naravno da obezbijedimo tehničku mogućnost za svako domaćinstvo na području općine Doboj Istok ima i priključak. Ja ne znam da li ste u komunikaciji sa Osnovnom školom Lukavica koja je dobila priključak od našeg komunalnog preduzeća. Šta da nismo dali priključak? Kako bi se nastava izvodila? Možda i ne znate da je voda do Ograđenice u

Lukavici sa područja općine Doboj Istok. Komunalno preduzeće je imalo sluha, dali dozvolu i prikopčali školu i sada je u redu. Da ne govorim o 10.000 stanovnika koji bi dali ne znam šta da imaju kvalitetno vodno snabdijevanje, a to je u našoj susjednoj općini gdje nije nacionalna stranka. To su ključni problemi o kojima mi trebamo razgovarati kada govorimo, po meni, veoma bitnoj ustanovi. Mi smo krenuli u onu priču da kupimo i donijeli smo odluku da kupimo i mi ćemo to kupiti. Ja se iskreno nadam da će do kraja godine sudski vještak analizira vrijednost firme, jer sve je to proces koji traje i ne može se to uraditi za heftu ili dvije, a malo nas je i korona poremetila. Moj cilj je i kao građanina i kao načelnika da pomognemo komunalnom preduzeću da ono opstane. Ono opstaje hvala Bogu i nije u dubiozi kao što su neka komunalna preduzeća, pa evo i u susjednim općinama. Kako deveraju? Znaju oni sami kako deveraju. Malo mi pomognemo, malo oni rade itd. Ja moram priznati da sam zadovoljan, jer tamo ima ljudi koji imaju bogato iskustvo. Jedan od njih je tehnički direktor koji ima u malom prstu gdje je koja cijev na području općine Doboj Istok. Sistem je tamo uhodan i nije bitno ko će biti direktor. Ja vam garantujem da godinu dana nemaju direktora oni će raditi isti posao kao i sa direktorom. To je tako, ljudi koji rade godinama, tamo ima malo ljudi koji imaju ispod 10 godina radnog staža, ono je sve 20 – 30 godina ili od osnivanja firme. Ja bih vas zamolio da im na najbolji način pomožemo i dalje da jačaju, da im pomožemo da nabavljaju opremu i to treba da bude naš cilj. Nabavili su kamion, dio sredstava je dala općina, a dio Ministarstvo za prostorno i odmah smo to malo unaprijedili, pa smo prije nabavili onaj za komunalno, a nabavljat ćemo i dalje. Smatram da treba još ovih sitnih mašina za čišćenje trotoara, za skidanje ovih živica itd. da proširimo djelatnost našeg komunalnog preduzeća, a samim tim i povećamo njihovu finansijsku dobit koju će oni raspoređivati po svom nahođenju.“

Emira Karić, predsjednica kluba vijećnika SDP: „Krenut ću od kolege Izeta koji ima firmu i meni se podrazumijeva da vi meni pružite kvalitetnu uslugu, jer podrazumijeva se ukoliko mi ne pružite onda ja imam određeno mišljenje i skrenut ću vam na to pažnju. Tako i ja podrazumijevam da ima određeni broj ljudi koji dobivaju platu i koji moraju razmišljati o pružanju kvalitetne usluge. Hoću da kažem načelnik skreće šta mi trebamo pričati. Ja smatram to ovako da pružanje kvalitetne usluge se podrazumijeva. Ukoliko dođe do određenih problema onda hajmo vidjeti šta treba i kako treba. Ja mislim da se solidno pruža usluga. Govorite da se ne treba pričati o direktoru, zašto niste podržali izvještaj, sami sebe demantirate. Niste podržali izvještaj, želite skinuti iz političkih razloga bla bla, sve se zna na ovoj općini i nemojte iz tačke u tačku demantirati. Kome se žali? To su stvari koje nisu definisane, nažalost, ni u kantonalnom ni u federalnom zakonu. Kome se žali na konkursnu proceduru? Ja znam kome kada su izbori i imenovanje direktora? Žališ se sudu. Ne mogu se žaliti sudu za konkursnu proceduru. Ja da se žalim i ne stavlja mene sud na mjesto direktora, a hoću da kažem da imamo problematiku i u tom segmentu. Mora se znati kome se kandidat žali na konkursnu proceduru. Imali smo slučaj gdje se jedan u školskom odboru opozvao na stranicu Zavoda za zapošljavanje, ali je bio pogrešan datum. Fino školski odbor skine njega kao kandidata i sada sud treba da vidi je li stranica pogriješila. Ne, vrati na školski odbor da vidiš zašto i uvaži ga kao kandidata. Pecamo jedni druge u bespotrebne stvari. Tako i ovo, je li problem nadzornom odboru odgovoriti nekome na žalbu, jesi u pravu ili nisi u pravu, a na kraju krajeva reci kome da se žali. To je meni lično nipodaštavanje mene kao građanina i kao kandidata. Isto tako vezano za vijećnička pitanja. Vi ste meni danas na samoj sjednici, predsjedavajući, uručili odgovor na vijećničko pitanje. To nije u redu. Mi smo svi u materijalima trebali dobiti, pa onda ukinimo u Poslovniku član gdje se kaže da se mogu postavljati vijećnička pitanja, ako ćemo raditi kako treba. Ne možete na samoj sjednici dostavljati odgovor na vijećnička pitanja, vijećničko pitanje mora dobiti i moja kolegica i svi vijećnici. Znači postavila sam javno i transparentno i tako dobivam odgovor.“

Fajik Muratović, vijećnik SDP: „Ja ću iskoristiti ovu priliku da pokušam malo pomoći JKP „Čistu“ i tehničkom rukovodiocu. Vidim ovdje planirane su zamjene cijevi i planiran je jedan rezervoar. Neće se puno dobiti sa povećanjem kapaciteta ovog rezervoara, ali hoću da vam predložim da ove cijevi koje idu na Debelo brdo zakrenete na Duja, pošto je trošak, moraju se mijenjati odozdo i tu se može uštediti. Samim tim ako ta dva rezervoara uvežete kao sistem spojenih posuda sa plovcima zadržite kapacitet i gore, a skinuli ste sa rezervoara u Frkatima čitave Ahimbašice i ovaj dio ovamo. Sa malim ulaganjem možete doći do kvalitetnog rješenja. Nisam mislio na ono kompletno pumpanje gore direktno nego sam mislio samo na ovo. Ako šta može pomoći, jer svako voli o sebi misliti da je pametan, pa tako i ja.“

Kemal Bratić, općinski načelnik: „Ja se potpuno sa vama slažem i ja smatram da neko treba odgovoriti. Vi ste postavili vijećničko pitanje, ja sam odgovorio. Ne znam da li ćete reći šta sam vam

odgovorio, ali ja ću iskoristiti priliku da kažem. Vi ste postavili vezano za usluge vatrogasne jedinice. Ja sam odgovorio da smo imali do 2016 - 17. godine ugovor sa Gračanicom, pa nam je neko naručio inspekciju u Civilnu zaštitu. Pokušali smo se dogovoriti sa susjednom našom općinom sa kojom smo imali usmeni dogovor za korištenje usluga. Međutim nisu htjeli da potpišemo ugovor o korištenju koji bi mi plaćali kao i svaku uslugu, nego su nas uslovljavali da pustimo vodovod tamo na susjednu općinu. To je čista istina. Nakon odbijanja naše susjedne općine u kojoj vlast nije nacionalna nazvao sam gradonačelnika tadašnjeg Obrena Petrovića i dogovorio u dvije minute da imamo usluge vatrogasnog društva Doboj besplatno, bez i jednog jedinog feninga, za sve korištenje usluga na području općine Doboj Istok. To je suština. Nisam mislio da isprovociram vas da diskutujete, a ni sada ne mislim to. Slažem se da su trebali svi vijećnici znati, ali da je to vama pasalo vi bi to rekli ovdje i da nešto nije kako treba vjerovatno bi pod inicijativom pokrenuli. Od vas kao vijećnika u vašoj diskusiji nisam čuo primjedbu na usluge, to ja govorim. Zamjerka je nečija žalba. Ako je to glavni problem u komunalnom preduzeću ja ću se povući, ja ne znam ništa ni o preduzeću, ni o čemu drugom. Znači nisam čuo da imaju loše usluge, da ne rade kako treba, da su kršili zakon, da su potrošili pare kako ne treba. Ja mislim da bi vi trebali glasati za izvještaj komunalnog preduzeća, jer nisam čuo ni jedne zamjerke osim ovih žalbi, a bio sam ovdje stalno prisutan.“

Emira Karić, predsjednica kluba vijećnika SDP: „Znate zašto sam postavila pitanje, prosljedit ću naravno i provjerit ću vezano za vijećničko pitanje zato što je diskusija bila u tom smjeru. Čudim se što ste uspostavili ugovor, naravno i ja bih uspostavila, a na kraju krajeva ja dolazim iz Socijaldemokratske partije gdje se sva tri konstitutivna naroda i ostali priznaju baš onako kako treba. Za ovom govornicom dosta dosta je izrečeno protiv hajmo reći i vlasti u Republici Srpskoj i samog pojma kao Republike Srpske i rata i boraca itd. Onda sam se malo začudila otkud prvo saradnja sa time što neko u ovoj vijećničkoj sali i ne priznaje predsjednika itd. Naravno ako je u pitanju ekonomska dobit i ja bih to odradila.“

Kemal Bratić, općinski načelnik: „Vi očito ili niste mene slušali ili niste dobro pročitali odgovor. Mi smo imali dogovor sa općinom Gračanica, usmeni dogovor, ali smo morali po Zakonu o zaštiti i spašavanju imati potpisan ugovor sa vatrogasnim društvom. Oni su odbili i zato sam morao. Hoćemo li tražiti iz Tuzle da nam dolazi vatrogasci? Znači morali smo naći neko rješenje. Sada smo hvala Bogu rasteretili i to pitanje. Dogovorili smo sa upravom Vatrogasnog društva Doboj samo ako je kakav veći požar, stambeni objekat i slično da će oni intervenisati, jer sada imamo dobrovoljce i već su ugasili dva požara uspješno. Znači od kako sam imanovan u prvi mandat za načelnika saradnja je bila sa općinom Gračanica, ali kada smo trebali potpisati ugovor uslovljavali su me da pustimo vodu tamo u Lukavicu. Ja sam to kategorički odbio, jer nisam bio nadležan. Takvu odluku treba da donese Općinsko vijeće. Nisu htjeli da potpišemo nikakav ugovor. Ako neko sjedi sa nekim na sijelu ili negdje u kafani, pa čuje neku drugu priču, to nije istina. Ja sam spreman sa svakim sjesti. Ponovo će doći inspekcija i ja sam na sudu bio zbog toga, jer nismo imali potpisan ugovor. Onda sam nazvao gradonačelnika, uvezao je sa direktorom i direktor je došao i mi smo za dva dana potpisali ugovor da imamo besplatne usluge gašenja požara od Grada Doboja. Prva nam je alternativa bila Gračanica, jer smo imali 4 - 5 godina sa njima saradnju.“

Dr. Ferid Konjić, predsjedavajući Općinskog vijeća: „Nažalost to je tako. Idemo na izjašnjavanje, jer očito nemamo šta govoriti o izvještaju Čista, pa smo zakačili druge stvari. Terbamo se izjasniti o Izvještaju o radu JKP „Čisto“ d.o.o. Doboj Istok za 2019. godinu. Ko je za?“

Glasanje: ZA - 11, PROTIV - 3, UZDRŽANIH - 3.

Ad.9. Razmatranje i usvajanje Izvještaja udruženja građana o utrošku dodijeljenih budžetskih sredstava za 2019. godinu sa završnim računom,

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Selmin Karić, vijećnik SDA: „Mislim da su udruženja opravdala sredstva i dobili smo u suštini ono što smo tražili, a možda bi u budućnosti trebali razmišljati o nekakvom drugačijem načinu finansiranja, ali to ćemo ostaviti budućim sazivima. Po mom mišljenju trebalo bi izdvojiti više sredstava, ali da to bude drugačiji način finansiranja recimo preko određenih projekata itd. To ćemo ostaviti narednom sazivu Općinskog vijeća neka iznađe način kako će to.“

Emira Karić, predsjednica kluba vijećnika SDP: „Ponukalo me zaista ova diskusija i prije svega hvala vam udruženja i neka vas je. Daj Bože da ima puno više udruženja, jer udruženja građana ispravljaju i ka civiliziranim načinima usmjeravaju ovo društvo. Svi mi moramo ohrabrivati ljude da se okupe, da osnuju određena udruženja, jer zaista rade dobar posao. Kažem neka vas je, lijepo vas je vidjeti na određenim manifestacijama, lijepo je da vi rješavate probleme i dobre i loše stvari naših građana. U svakoj prilici uvijek ste dobro došli budući da ste opravdali svoje djelovanje do sada. U potpunosti se slažem i zato sam i izašla, a obećala sam Senadi da više neću izlaziti. Smatram da se veća finansijska sredstva moraju dati udruženjima, jer ovo je na kapaljku, ovo je na kašiku i ovo se jedva preživljava. Hvala vam i na ovaj način kako preživljavate, a ipak ste viđeni na svim a kako ste uspjeli to ste pokazali u svom finansijskom izvještaju. Slažem se putem projekata, jer to je najbolji način. Čekajte novi saziv, da li ko od nas bio možete se opozvati vi ste rekli to i to, jer stvarno veća finansijska sredstva moraju ići prema udruženjima građana. Zaista ćemo se boriti, ako ja i kolega Izet, dobro Hasko neće biti nažalost, a ja sam rada da ga vidam. Zaista ćemo se potruditi da idemo u pravom smjeru da pojačamo, pa mali pomak, pa iduće godine veći itd. Nemojte očekivati nikakvo zlato i srebro, ali mali pomak i ja ako budem obećavam da ću se i glavom i nogama i rukama boriti.“

Dr. Ferid Konjić, predsjedavajući Općinskog vijeća: „Ovo su predizborni skupovi očito. Molim vas držite se teme o čemu treba da pričamo. Ko će biti i hoće li biti to niko ne zna. Sve što se dobro kaže na kraju ispadne da pravimo od ovoga ... nije tema na kojoj se mogu praviti nekakvi komentari. Nije to samo prema kolegi, evo došli su predstavnici udruženja o kojima pričate hvalospjeve i u tim svim komentarima još nekakve stvari. Možemo prenijeti budućem sazivu, a ko će biti i kako će postupati, to nije do nas. Hajmo reći svoje, ovako proizvodimo nekakve replike i izgubimo smisao materijala koji smo dobili.“

Hasan Hasančević, predsjednik kluba vijećnika SDA: „Uvaženi predstavnici udruženja pošto ste tu želim iskreno da vas poselamim i pozdravim. Insan snuje Alah odlučuje, tako je u muslimana. Tako da se u tom dijelu ne bih osvrtao. Molim vas nastavite svoj rad, pogotovo boračka udruženja koja su veoma bitna za ovo društvo i korekciju sistema i za zadovoljavanje pravde za borce koji su, neću reći oštećeni, ali ne mogu ostvariti svoja prava maksimalno koliko im pripadaju. Nažalost tako je u sistemu, pa smo oslonjeni i na vas. Pored ovoga od vijeća, kantonalnih, federalnih i državnih skupština došli smo u poziciju da udruženja građana, pogotovo boračka, moraju se zauzimati za određena prava koja naravno ne bi trebala biti upitna. Kolegici Emiri poručujem vidimo se na prvim sljedećim izborima, pa ćemo vidjeti ko će pobijediti, a ko neće.“

Mehmed Mehinović, predsjednik kluba vijećnika SBiH: „ Naravno ne pada mi napamet da pričam o predizbornom, jer ne doživljam tako ovo naše vijeće. Ima vremena za to i kada dođe vrijeme, a možda i neće biti izbora. Naime, klub Stranke za Bosnu i Hercegovinu će podržati ove izvještaje i čestita rukovodiocima ovih udruženja, jer mi znamo da je to gubljenje svog slobodnog vremena za dobrobit društva i naravno ljudima treba odati priznanje. Htjeli smo nešto da prokomentarišemo, a to je gledajući ove izvještaje vidjeli smo da dosta udruženja ima svoje vlastite prihode, a dosta udruženja nema svojih vlastitih prihoda. Bilo bi dobro malo više obratiti pažnju na ova udruženja koja se bore na neki način da od svojih članova imaju prihode, da ne pričamo o Udruženju žena, jer i pored ovog što su dobili od općine oni imaju svoje vlastite prihode i imaju svoj vlastiti rad, kao Organizacija porodica šehida. Mislim da na njih malo više trebamo obratiti pažnju svi mi, naravno, kada se bude kreirao budžet ubuduće da takva udruženja još više stimuliramo kroz još veća davanja iz budžeta naše općine. Još jedanput u ime kluba Stranke za Bosnu i Hercegovinu čestitam svim udruženjima na angažovanju i stvaranju boljeg ambijenta u Doboju Istoku.“

Kemal Bratić, općinski načelnik: „ Neko je na jednoj od prethodnih tačaka rekao da treba biti virtouz pa sa ovako malo sredstava da svi budu donekle zadovoljni. Ja znam da svim udruženjima građana nije dovoljan ovaj iznos, ali oni to znaju, evo gledamo se u oči, da Općinski načelnik zna iz budžetske rezerve ili na neki drugi način pomoći, a i pomagat ću dok sam ja tu. Želim da vam čestitam na radu i želim da vam čestitam na jednoj dobroj saradnji i želim da vam skrenem pažnju nemojte nasjedati na populističke priče. Pogotovo od vas vijećnice, vi ste rekli da je rat '92 - '95. građanski i nemojte vi boračkim udruženjima da govorite.“

Dr. Ferid Konjić, predsjedavajući Općinskog vijeća: „Emira, sa mjesta nema govora. Prosvjetnom radniku ja trebam objašnjavati i ja svima maksimalno dopuštam da govore. Poštujte, jer ima mjesto odakle se govori. To dovodi do onoga da trebamo razmišljati šta ćemo reći i u šali. Ja sam rekao ovo su ozbiljne stvari i na ovim mjestima moramo razmišljati šta govorimo.“

Kemal Bratić, općinski načelnik: „Ako će biti ovako ja ću napustiti Vijeće, neću ni prisustvovati, ako će me svako od vijećnika prekidati. Ja ću, predsjedavajući, demonstrativno napustiti Vijeće, jer ja ni jednog vijećnika nisam za 8 godina prekinuo sa mjesta. Neka mi neko kaže jesam li ikome upao u riječ. Ja samo govorim što je neko rekao, a šta je mislio ili ne mislio, ja ne ulazim u to. Ono što želim da kažem da sva udruženja građana ne rade isto. Posebno na prvom mjestu ja kao demobilisano borac, kao pripadnik izviđačko diverzantske čete stavljam udruženja od posebnog značaja i pomoći ću ima koliko god mogu i kada ne budem načelnik. Vjerovatno ću se uključiti u neka od njih da radim, jer imam i pravo i obavezu da pomognem. Da li je dovoljno sredstava? Naravno da nije dovoljno sredstava, ali kada kreiramo budžet ne možemo jednim dati, a drugim ne dati. To je problem. Oni znaju, evo gledamo se u oči, da načelnik njima pomaže i dodatno i pomagat će. Zamolio bih ovo Vijeće za koje smatram da je radilo dobro, nemojte voditi kampanju ovdje, vodit ćemo je vani ako bude potrebno. Ovdje nam ne treba kampanja. Hajmo raditi ono za šta smo plaćeni i da privedemo ovaj mandat kraju. Kampanju ćemo tamo, jer tamo je dozvoljeno sve da pričamo. Svako ko nešto ovdje kaže, normalno će izazvati nečiji revolt i da vodimo računa da budemo dostojanstveni i da završimo ovaj mandat, ako Bog da, po meni uspješno. Uradili smo dosta stvari, a uradit ćemo još do kraja ovog mandata dosta značajnih stvari. Vama čestitam i želim da vam se zahvalim što se prihvatate takve odgovornosti, jer nije lahko voditi kuću, a kamoli nešto drugo. Želim vam puno zdravlja i uspjeha u budućem radu.“

Emira Karić, predsjednica kluba vijećnika SDP: „Da bi odbranila riječi, jer je ovdje rečeno nemojte populistički pričati, takođe ću napraviti jednu retrospekciju. Moj prvi mandat u Općinskom vijeću, gdje sam odmah na prvi budžet uložila amandman da se Udruženje žena stavi na budžet, pa druga godina tog istog mandata da se Udruženje žena stavi na budžet, pa treća godina istog mandata da se Udruženje žena stavi na budžet, pa sam četvrtu godinu pokušala zaprijetiti da će doći sve iz Udruženja žena, pa ako možete da glasate. Onda ste preko Admire Šišić to je njezini amandman bio, gdje sam se ja oduševila, jer naravno nije bitno čiji je amandman, bitno je da Udruženje žena dođe. Rekla sam hajmo sa 1.000 KM, pa ćemo kasnije povećavati, nemojte biti neskromni. Znači može se potvrditi ovdje da je Emira Karić i SDP četiri godine zaredom bio je amandman na budžet da se ubaci Udruženje žena. Znači ne djelujem populistički nego hvalim kao što sam htjela i prije da ih pohvalim i hvala bile na budžetu ili ne bile.“

Kemal Bratić, općinski načelnik: „Ja i dalje smatram da sve što radite da je to populistički i politikanstvo, jer sve što vi predložite ja neću prihvatiti. Nisam htio da izađem, jer bi mene okrivili za inicijativu. Ja ću sada reći o inicijativi, a nadam se da mi nećete zamjeriti. Vaša inicijativa za komunalnu taksu je toliko nakaradna. Zašto? Niste rekli ni kako, ni ko, ni zašto. Da li trebamo osloboditi komunalne takse one koje su radili kao i one koji nisu radili. Ja mislim da ne trebamo. Da li trebamo osloboditi komunalne takse one koji su uvećali profit u pandemiji koronavirusa, koji su prodavali po basnoslovnim cijena zaštitnu opremu? Da li trebamo i njih osloboditi komunalne takse? Treća najznačajnija stvar, 90 % komunalne takse je već ubačeno u Budžet Općine Doboj Istok. Da znate te informacije ne bi vjerovatno ni podnijeli tu inicijativu. To je moje mišljenje, a ja govorim realno.“

Dr. Ferid Konjić, predsjedavajući Općinskog vijeća: „Ponovo smo došli u situaciju da zaboravljamo o čemu ćemo glasati. Proizveli smo to da su čekali cijeli dan, a mi pričamo o stvarima o kojima nema potrebe.“

Senada Džanić, predsjednica kluba vijećnika SBB – BPS: „Sve vas selamim i pozdravljam, kao i predsjednicu Udruženja žena Doboj Istok. Stvarno mi je žao što su ostali predsjednici napustili, ali me ne iznenađuje, jer smo se udaljili od tačke, pa se ja kao vijećnik izvinjavam. Pošto sam i sama član Udruženja žena Doboj Istok ja posebne čestitke upućujem Udruženju žena. Pošto sam borac i ispred Kulturno umjetničkog društva „2. juni“ i uzimam učešće u mnogim aktivnostima uistinu od srca čestitam ovim udruženjima. Nadam se da će doći vrijeme kada će se u općini Doboj Istok napraviti takav budžet da se sva udruženja uvrste u budžet i da se napravi nekakav način podjele sredstava. Smatram da nije u redu da

pojedina udruženja jesu u budžetu, a ostali nisu, pa na sve moguće načine traže da dođu do načelnika i mole za pomoć. Ako dajemo i pružamo podršku udruženjima onda ta podrška treba da bude ista za sve.“

Dr. Ferid Konjić, predsjedavajući Općinskog vijeća: „Nema više replika, jer izgubljeno je dosta vremena. Tačka dnevnog reda je izvještaj udruženja, a ne inicijativa.“

Sudina Hadžić, predsjednica Udruženja žena Doboj Istok: „Sve vas pozdravljam. Udruženje žena ima 1000 KM na budžetu za rad udruženja. Međutim, kada god smo se obratili načelniku za bilo kakvu donaciju koja je bila potrebna izašao nam je u susret i mi smo zahvalni na tome. Udruženje žena određenu količinu sredstava izdvaja iz svojih ličnih budžeta. Znači za sav naš rad, za sve naše pripreme bilo kakvih aktivnosti da li je manifestacija hrane ili sajmovi tamo gdje smo zastupljeni, gdje smo prijavljeni i gdje se odazivamo. Ovom prilikom želim da se zahvalim Općini na bilo kakvoj pomoći, obzirom da postoje udruženja koja nemaju apsolutno nikakvu finansijsku pomoć.“

*Dr. Ferid Konjić, predsjedavajući Općinskog vijeća: „Dajem na izjašnjavanje. Ko je za ovaj Izvještaj?“
Glasanje: ZA – 17, PROTIV – 0, UZDRŽANIH – 0.*

Ad.10. Razmatranje i usvajanje prijedloga Rješenja o razrješenju predsjednika i članova Upravnog odbora Javne zdravstvene ustanove Dom zdravlja Doboj Istok.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih i samo da pojasnim. Obzirom da je prije glasanja spominjano da predstavnik ispred Ministarstva koji je ispred SBB nije podnio ostavku, a u izjavi direktora smo čuli da on nije imao nikakve komunikacije sa Ministarstvom. Ako je to tačno, a nemamo razloga ne vjerovati direktoru, onda taj predstavnik nije odradio svoju funkciju i ne vidim nikakvog razloga da bi mogao da nastavi rad. Po toj liniji je došao i mogao je uspostaviti komunikaciju. Uloga Upravnog odbora i jeste da ispred osnivača, odnosno predstavnika vlasti bude komunikacija sa menadžmentom, kao i ova druga dvojica trebaju imati komunikaciju sa osnivačem. On je predstavnik Ministarstva i on je trebao imati komunikaciju sa Ministarstvom i uspostaviti druge relacije menadžmentu da otvori vrata do Ministarstva.“

Senada Džanić, predsjednica kluba vijećnika SBB – BPS: „Almir Husaković je došao u Upravni odbor preko konkursa koji je raspisalo Ministarstvo zdravstva i predstavlja političku partiju Saveza za bolju budućnost Fahrudin Radončić. Međutim, nije Almir Husaković jedini koji je trebao da uspostavi kontakt sa Ministarstvom. Čiji je Dom zdravlja Doboj Istok? Ko je predsjednik tog Upravnog odbora? Ako je trebalo da rad bude na Almiru Husakoviću, ja odgovorno tvrdim, jer sam razgovarala juče sa njim, da sve što je bilo do njega da je uradio ispravno. Doprinio je koliko je mogao doprinijeti boljem radu našeg Doma zdravlja.“

*Dr. Ferid Konjić, predsjedavajući Općinskog vijeća: „Ima li još diskutanata? Nema. Ko je za?“
Glasanje: ZA – 9, PROTIV – 5, UZDRŽANIH – 3.*

Ad.11. Razmatranje i usvajanje prijedloga Rješenja o privremenom imenovanju Upravnog odbora Javne zdravstvene ustanove „Dom zdravlja“ Doboj Istok.

*Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju. Ne vidim prijavljenih diskutanata i dajem na izjašnjavanje. Ko je za?“
Glasanje: ZA – 9, PROTIV – 6, UZDRŽANIH – 2.*

Ad.12. Razmatranje i usvajanje Informacije o izvršenju budžeta općine Doboj Istok za period januar – mart 2020. godine.

Dr. Ferid Konjić, predsjedavajući Općinskog vijeća: „Materijal ste dobili, tačku dajem na diskusiju.“

Selmin Karić, vijećnik SDA: „ Kao što vidimo iz priloženog dokumenta da su prihodi sa 24,45 % izvršenja pratili rashode sa 23 %, razlika je nekih 1,45 % što je po mom mišljenju izuzetno dobro. Posmatrani period je 01.01. – 31.03. i po ovom dokumentu, kao što vidimo budžet je izuzetno dobro planiran. Izvršenje od indirektnih poreza je skoro onako kako je planirano 24,64 %, od direktnih je preko 25 % i na rashodima plate su isto pratile plan. Po ovim pokazateljima budžet je izuzetno dobro planiran, međutim vidjet ćemo šta će se dešavati u narednom periodu obzirom da znamo da je ova pandemija prouzokovana COVID - 19 izazvala velike pometnje i poremećaje u privredi, odnosno u zemljama gdje su privrede puno jače, pa i u našoj vjerovatno. U narednom periodu ćemo osjetiti te stvari koje je ona prouzokovala. Iz medija se već dobivaju informacije da će viši nivoi smanjivati određene tranše prema nižim nivoima, a vjerovatno i prema našoj općini, naročito kada su u pitanju kapitalna ulaganja. Ja se nadam da neće doći u pitanje bar isplate onih osnovnih stvari prije svega mislim na plate uposlenika, radnika i onih institucija koje direktno ovise o budžetu.“

Dr. Ferid Konjić, predsjedavajući Općinskog vijeća: „Ima li još diskutanata? Ne vidim prijavljenih i dajem na izjašnjavanje. Ko je za Informaciju?“

Glasanje: ZA – 10, PROTIV – 0, UZDRŽANIH – 7.

Na ovaj način smo iscrpili današnji dnevni red i hvala vam na učešću u radu.“

Sjednica je završena u 13,30 sati.

*ZAPISNIČAR
Behara Hadžić*

*SEKRETAR
Omer Hadžić*

*PREDSJEDAVALA
OPĆINSKOG VIJEĆA
dr. Ferid Konjić*

Službena zabilješka:

Zapisnik je usvojen na 37. redovnoj sjednici Općinskog vijeća Doboje Istok održanoj dana 27.06.2020. godine.

U Klokotnici, dana 29.06.2020. godine

*Zabilješku sačinio
Omer Hadžić, sekretar Općine*